

唐詩紀事



唐詩紀事卷第二十三

司馬退之 吳筠

蘇廣文

尉遲匡

王誣

陳希烈 高適

張彪

張子容

李之芳

附崔或

孟浩然 岑參

司馬退之

洗心詩云不踐名利道始覺塵土腥不味稻粱食始覺神骨清羅浮奔走
外日月無短明山瘦松亦勁鶴老飛更輕逍遙此中客翠髮皆長生草木
多枯色雞犬無新聲君有出俗志不貪英雄名傲然脫冠紱改換人間情
去矣丹霄步向晚雲冥冥

退之道士

吳筠

筠字正節華陽人舉進士不第天寶初請隸道士籍玄宗命待詔翰林高
力士善浮屠乃短筠於帝筠懇還嵩山大曆中死會稽剡中弟子私諡宗

玄先生筠見惡於力士而斥故文章深詆釋氏所善孔巢父李白歌詩略
相甲乙事潘師正學鍊養術天寶初遊會稽與李白隱剡中赴闕薦白俱
待詔翰林

卷

覽古八首云聖人重開濟明道欲救時孔席不暇暖墨突何嘗緇興言振
頽綱將以有所維君臣恣淫惑風俗日凋衰三代業遽隕七雄遂交馳庶
物墜塗炭區中若焚絲秦皇燎儒術方冊靡孑遺大漢歷五葉斯文復崇
推乃驗經籍道與世同屯夷弛張固天意設教安能持其一棟宇代巢穴其
來自三皇跡生固爲累經始增百王瑤臺旣滅夏瓊室復殞商後車世不
悟秦氏興阿房繼踵迷反正漢家崇建章力役弊萬人瓌奇殫八方徇志
仍未極促齡已云亡侈靡竟何在荆榛生廟堂其二吾觀采苓什復感青蠅
詩讒佞亂忠孝古今同所悲姦邪起譖害骨肉相殘夷漢儲殯江充晉嗣
滅驪姬天性猶可閒君臣固其宜子胥烹吳鼎文種斷越鉞屈原沈湘流
厥戚咸自貽何不若范蠡扁舟無還期其三魯侯祈正術尼父從棄捐漢主

思英雄賈生被排遷始皇重韓子及覩乃不然漢武喜相如既徵復忘賢
貴遠世咸爾賤今理共然方知古來士難以效當年其四食其昔未偶落魄

爲狂生一朝君臣契雄辯何縱橫運籌康漢業憑軾下齊城既以智所達

還爲智所烹豈若終貧賤酣歌本無營其五晁錯抱遠策爲君納良規削彼

諸侯權永用得所宜姦臣負舊隙乘釁謀相危世主竟不辯身戮宗且夷

漢景稱欽明濫罰猶如斯比干與龍逢殘害何足悲其六絳侯成大績賞厚

位仍尊一朝對獄吏榮辱安可論蘇生佩六印奕奕爲殃原主父食五鼎

昭昭成禍根李斯佐二辟巨釁鍾其門霍孟翼三后伊戚及後昆天人忌

盈滿茲理固永存方知得意者何必乘朱轡滅景棲遠壑絃歌對清樽二

疎返海濱蔣詡歸園林蕭灑去物累此謀誠足敦其七聖人垂大訓奧義不

苟設天道殃頑兇神明佑懿哲斯言猶影響安得復回穴魴瞍誕英睿唐

虞育昏孽盜蹠何延期顏生乃短折魯隱全克讓禍機遂潛結楚穆肆巨

逆福柄奚赫烈田常弑其主祚國久罔缺管仲存霸功世祀成詭說漢氏

方版蕩羣闖恣邪譎蹇蹇陳蕃徒孜孜抗忠節誓期區宇靜爰使兇醜絕
謀協事靡從俄而返誅滅古來若茲類紛擾難盡列道遐理微茫誰爲我
昭晰吾將詢上帝寥廓詎躋徹已矣勿用言忘懷庶自悅

其八

蘇廣文

自商山宿陶令隱居云聞道桃源堪避秦尋幽數日不逢人煙霞洞裏無
雞犬風雨林中有鬼神黃公庭下三芝秀陶令門前五柳春醉臥白雲閒
入夢不知何物是吾身

夜歸華川因寄幕府云山村寥落野人稀竹裏衡門掩翠微溪路夜隨明
月入亭皋春伴白雲歸稽康懶慢仍耽酒范蠡逋逃又拂衣汀畔數鷗閒
不起只應知我已忘機

春日過田明府遇焦山人云陶公歸隱白雲溪買得春泉溉藥畦夜靜林
閒風虎嘯月明花上露禽棲陳倉邑吏驚烽火太白山人訝鼓鼙相見只
言秦漢事武陵溪裏草萋萋

尉遲匡

李林甫當開元末權等人主幽并人尉遲匡耿槩士也以頻年不第投書
林甫皆擊刺之說匡有暮行潼關之作云明月初出海黃河流上天又觀
內外樓上踏歌曰芙蓉初出水桃李忽無言又塞上曲云夜夜月爲青冢
鏡年年雪作黑山花林甫曰蕭穎士嘗忤吏部王尙書幾至鞭撲子詩未
及穎士吾復名異於王重欲相干三思可矣匡知見怒惶怖趨出栖屑無
依退歸林野

王諷

除夜云今歲今宵盡明年明日催寒隨一夜去春逐五更來氣色空中改
容顏暗裏回風光人不覺已著後園梅

元夕觀燈云暫得金吾夜通看火樹春停車傍明月走馬入紅塵妓雜歌
偏勝場移舞更新應須盡記取說向不來人

諷登開元進士第

陳希烈

奉和聖製三日詩云上巳迂龍駕中流泛羽觴酒因朝太子詩爲樂賓王
錦纜方舟渡瓊筵大樂張風搖垂柳色花發異林香野老無公事朝臣飲
歲芳皇情被羣物中外洽恩光

雲生棟梁閒云一片蒼梧意氛氲生棟梁下簾山足暗開戶日添光偏使
衣裘潤能令枕簟涼無心伴行雨何必夢荆王

希烈宋州人工文章開元中褚無量元行冲卒希烈與康子元進講禁中
天寶中爲相國忠忌之卽薦韋見素代相罷爲太子太師失職無賴祿山
盜京師遂相之肅宗時賜死于家

高適

同顏六少府旅居秋中之作云傳君昨夜悵然悲獨坐深齋落木時逸氣
舊來凌鷁雀高才何得混妍媸迹勞黃綬人多嘆心在青雲世莫知不是
鬼神無正直從來州縣有瑕疵

封丘作云我本漁樵孟諸野一生自是悠悠者乍可狂歌草澤中寧堪作
吏風塵下祇言小邑無所爲公門百事皆有期拜迎官長心欲碎鞭撻黎
庶令人悲悲來向家問妻子舉家盡笑今如此生事應須南畝田世情付
與東流水夢想舊山安在哉爲銜君命日遲迴乃知梅福徒爲爾轉憶陶
潛歸去來

開元二十六年有從元戎出塞而還者作燕歌行以示予適感征戍之事
作燕歌行云漢家煙塵在東北漢將辭家破殘賊男兒本自重橫行天子
非常賜顏色撥金伐鼓下榆關旌旆透池碣石閒校尉羽書飛瀚海單于
獵火照狼山山川蕭條極邊土胡騎憑陵雜風雨戰士軍前半死生美人
帳下猶歌舞大漠窮秋草木腓孤城落日鬪兵稀身當恩遇常輕敵力盡
關山未解圍鐵衣遠戍辛勤久玉筯應啼別離後少婦城南欲斷腸征人
塞北空回首邊庭飄飄那可度絕域蒼茫何所有殺氣三時作陣雲寒聲
一夜傳刁斗相看白刃血紛紛死節從來豈顧勳君不見沙場征戰苦至

今猶憶李將軍

古大梁行云古城蒼莽多荆榛驅馬荒城愁殺人魏王宮館盡禾黍信陵
賓客隨灰塵憶昔雄都舊朝市軒車照曜歌鐘起軍容帶甲三十萬國步
連營一千里全盛須臾那可論高臺曲池無復存遺墟但有狐狸窟古地
空餘草木根暮天搖落傷懷抱倚劍悲歌對秋草俠客猶傳朱亥名行人
尙識夷門道白壁黃金萬戶侯寶刀駿馬填山丘年代淒涼不可問往來
惟有水東流

行路難云君不見富家翁舊時貧賤誰比數一朝金多結豪貴萬事勝人
健如虎子孫成長滿眼前妻能管絃妾歌舞自矜一身忽如此卻笑旁人
獨愁苦東鄰少年安所如席門窮巷出無車有才不肯學干謁何用年年
空讀書

邯鄲少年行云邯鄲城南遊俠子自矜生長邯鄲裏千場縱博家仍富幾
處報讐身不死宅中歌笑日紛紛門外車馬長如雲未知肝膽向誰是令

人卻憶平原君君不見卽今交態薄黃金用盡還疎索以茲感歎辭舊遊
更於時事無所求且與少年飲美酒往來射獵西山頭適字夫達滄州人
客梁宋閒舉有道科哥舒翰表爲西河從事佐翰守潼關天子西幸適閒
道及帝河池遷侍御史後代崔光遠爲西川節度使廣德中召還爲右散
騎常侍永泰初卒適以功名自許而言浮其術年五十始爲詩即工以氣
質自高每一篇出好事者輒傳布

商璠云適性落拓不拘小節恥預常科隱跡博徒才名自遠然適詩多胸
臆兼有氣骨故朝野通賞其文至如燕歌行等篇甚多佳句且余所愛者
未知肝膽向誰是令人卻憶平原君吟諷不厭矣

張彪

北遊還酬孟雲卿云忽忽忘前事志願能相乖衣馬久羸弊誰信文與才
善道居貧賤潔服蒙塵埃行行無定心壞坎難歸來慈母憂疾疹家室念
栖哀與君宿姻親深見中外懷俟余昔時節悵望臨高臺

古別離云別離無遠近事歎情亦悲不聞車輪聲後會將何時去日忘寄

書來日乖前期縱知明當返一息千萬思

毛本云或作趙微明

杜子美寄張十二山人彪詩云獨臥嵩陽客三違潁水春艱難隨老母慘澹向時人謝氏登山屐陶公漉酒巾羣兇彌宇宙此物在風塵歷下辭姜被關西得孟鄰早通交契密晚接道流新靜者心多妙先生藝絕倫草書何太古詩興不無神曹植休前輩張芝更後身數篇吟可老一字買堪貧讀子美詩則彪蓋潁洛閒靜者天寶末將母避亂故子美以詩寄云

毛本杜

詩三十韻茲
僅錄十韻

彪雜詩云富貴多勝事貧賤無良圖上德兼濟心中才不如愚商者多巧智農者爭膏腴儒生未遇時衣食不自如久與故交別他榮我窮居到門懶入門何況千里餘君子有褊性矧乃尋常徒行行任天地無爲強親

神仙云神仙可學無百歲名大約天地何蒼茫人間半哀樂浮生亮多惑善事翻爲惡爭先等驅逐中路苦瘦弱長老思養壽後生笑寂寞五穀非

長年四氣乃靈藥列子何必待吾心滿寥廓

張子容

長安早春詩云開國維東井城池起北辰咸歌太平日共樂建寅春雲靜
青山樹冰開黑水濱草迎金埒馬花伴玉樓人鴻漸看無數鶯聲聽欲頻

何當桂枝擢歸及柳條新

毛本云或作孟浩然

九日陪潤州邵使君登北固山云五馬向山椒重陽出麗譙徐州帶綠水
楚國在青霄張幕連江樹開筵接海潮凌雲詞客語迴雪舞人嬌梅福慙
仙友羊公賞下僚新豐酒舊美況是菊花朝

送孟浩然歸襄陽詩云冬月相逢地西亭送別津風濤開解纜雪海去愁
人鄉在桃林岸山連楓樹春因懷故園意歸與孟家鄰

孟浩然送張子容赴進士舉詩云夕曛山照滅送客出柴門惆悵野中別
殷勤歧路言茂林余偃息喬木爾飛翻無使谷風誚須令友道存

除夜樂城簡孟浩然云遠客襄陽郡來過海畔家罇開柏葉酒燈發九枝

花妙曲逢盧女高才得孟嘉東山行樂意非是競繁華

浩然歲除夜樂城張少府宅云雲海訪甌閩風濤泊島濱何知歲除夕得

見故鄉新予是乘桴客君為失路人平生復能幾一別十餘春

巫山詩云巫嶺巖巖天際重佳期宿昔願相從朝雲暮雨連天暗神女知

來第幾峯

子容先天二年進士曾為樂城尉與孟浩然友善貶樂城尉日作云竄謫

邊窮海川原近惡溪有時聞虎嘯無夜不猿啼地煖花常發巖高日易低

故鄉可憶處遙指斗牛西

李之芳 崔 賦

大曆中子美有夏夜李尚書筵送宇文石首赴縣聯句云愛客尚書貴之

官宅相賢 美子 酒香傾坐側帆影駐江邊 芳 翟表郎官瑞鳧看令宰仙 賦 雨

稀雲葉斷夜久燭花偏 美子 數語欵紗帽高文擲彩牋 芳 興饒行處樂離惜

醉中眠 賦 單父長多暇河陽實少年 美子 客居逢自出為別幾悽然 芳 宇文

晁尚書之甥崔彧司業之孫也

之芳太宗子蔣王惲之曾孫有令譽安祿山奏爲范陽司馬祿山反自拔歸京師廣德初使吐蕃被留二歲乃歸拜禮部尚書改太子賓客薨子美哭之芳詩云江雨銘旌溼湖風井逕秋又曰復魄昭丘遠歸魂素滻偏蓋死于江湖也

孟浩然

孟浩然襄陽人也骨貌淑清風神散朗救患釋紛以立義灌園藝圃以全高交遊之中通脫傾蓋機警無匿學不攻儒務掇菁華文不按古匠心獨妙五言詩天下稱其盡善閒游祕省秋月新霽詩英聯詩次當浩然句曰微雲淡河漢疎雨滴梧桐舉座嗟其清絕咸以之閣筆不復爲綴丞相范陽張九齡侍御史京兆王維尚書侍郎河東裴朏范陽盧僎大理評事河東裴總華陽太守滎陽鄭倩之太守河東獨孤冊率與浩然爲忘形交山南採訪使太守昌黎韓朝宗謂浩然閱深詩律實諸周行必詠穆如之頌

因入奏與偕行先揚于朝約日引謁後期浩然曰業已飲矣身行樂耳遑恤其他遂畢飲不赴由是聞罷浩然不之悔也其好學忘名如此王士源他時嘗筆讚之曰導漾炳靈寔生楚英浩然清發亦自其名開元二十八年王昌齡遊襄陽時浩然疾發背且愈相得歡飲浩然宴謔食鮮疾動終于南國年五十有二子儀甫浩然文不爲仕每爲詩佇興而作故或遲行不爲飾動求真適故似誕遊不爲利期以放情故常貧名不繫於選部聚不盈於甌石雖屢空不給自若也

王士源序

傳曰張九齡爲荊州辟置于府罷開元末病疽背卒後樊澤爲節度使時浩然墓碑壞符載以牋叩澤曰故處士孟浩然文質傑美殞落歲久門裔陵遲丘隴頽沒永懷若人行路慨然前公欲更築大墓闔州搢紳聞風竦動而今外迫軍旅內勞賓客牽耗歲時或有未遑誠令好事者乘而有之負公夙志矣澤乃更爲刻碑鳳林山南封寵其墓初王維過郢州畫浩然像于刺史亭因曰浩然亭咸通中刺史鄭誠謂賢者不可斥其名更曰孟

亭

王維憶孟詩曰故人今不見日夕漢江流借問襄陽老江山空蔡州

皮日休孟亭記云明皇世章句之風大得建安體論者推李翰林杜工部爲尤介其閒能不愧者惟吾鄉之孟先生也先生之作遇景入詠不鉤奇抉異令齷齪束人口者涵涵然有干霄之興若公輸氏當巧而不巧者也北齊美蕭愨芙蓉露下落楊柳月中疎先生則有微雲澹河漢疎雨滴梧桐樂府美王融日霽沙嶼明風動甘泉燭先生則有氣蒸雲夢澤波動岳陽城謝朓之詩句精者有露溼寒塘草月映清淮流先生則有荷風送香氣行露滴清響此與古人爭勝於毫釐也

明皇以張說之薦召浩然令誦所作乃誦北闕休上書南山歸敝廬不才明主棄多病故人疎白髮催年老青陽逼歲除永懷愁不寐松月夜窗虛帝曰卿不求朕豈朕棄卿何不云氣蒸雲夢澤波動岳陽城

商璠云余嘗謂禰衡不遇趙壹無祿其過在人及觀襄陽孟浩然磬折謙

退才名日高天下籍甚竟淪落明代終於布衣悲夫予方知命矣且浩然
詩文華采芊苒經縷綿密半好雅調全削凡體至如衆山遙對酒孤嶼共
題詩無論興象復兼故實又波動岳陽城亦爲高唱也建德江宿云移舟
泊煙渚日暮客愁新野曠天低樹江清月近人

裴司士見尋云府寮能枉顧家醞復新開落日池上酌清風松下來廚人
具雞黍稚子摘楊梅誰道山公醉猶能騎馬迴

早寒江上有懷云木落鴈初度北風江上寒我家江水上遙隔楚雲端鄉
淚客中盡孤帆天際看迷津欲有問平海夕漫漫

永嘉上浦館逢張子容云逆旅相逢處江村日暮時衆山遙對酒孤嶼共
題詩解字鄰鮫室人煙接島夷鄉關萬餘里失路一相悲

湖上作云八月湖水平含虛混太清氣蒸雲夢澤波動岳陽城欲濟無舟

楫端居恥聖明徒憐垂釣叟空有羨魚情

毛本云集
作岳陽樓

峴山作云石潭傍隈隩沙榜曉黃緣試垂竹竿釣果得查頭鱸

又冬至過友人云鳥泊隨陽鴈魚藏縮項鰯故杜子美憶襄陽云吾友襄陽孟浩然新詩句句盡堪傳至今耆舊無他語謾鈎查頭縮項鰯

題鹿門山云清曉因興來乘流越江峴沙禽近方識浦樹遙莫辨漸到鹿門山山明翠微淺巖潭多屈曲舟楫屢回轉昔聞龐德公採藥遂不返金澗餌芝朮石牀臥苔蘚紛吾感耆舊結纜事攀踐隱迹今尙存高風邈已遠白雲何時去丹桂空偃蹇探討意未窮迴艇夕陽晚

張祜題浩然宅云高才何必貴下位不妨賢孟簡雖持節襄陽屬浩然

岑參

送王大昌齡赴江寧詩云對酒寂不語悵然悲一作愁送君明時未一作不得

用白首徒攻文澤國從一官滄波幾千里羣公滿闕下獨去過淮水舊家富春渚嘗憶臥江樓自聞君欲行頻望南徐州窮巷獨閉門寒燈靜深屋北風吹微雪抱被肯同宿君行到京口正是桃花時舟中饒孤興湖上多

新詩潛虬且深蟠黃鶴一作鵠飛未晚惜君青雲器努力加餐飯

奉送李太保兼御史大夫充渭北節度使卽太尉光弼之弟也詩云詔出
未央宮登壇近總戎上公周太保副相漢司空弓抱關西月旗飛渭北風
弟兄皆許國天地荷成功

宿華陰東郭客舍憶閣防詩云次舍山郭近解鞍鳴鐘時主人炊新粒行
子充夜饑關月生首陽照見華陰祠蒼茫秋山晦蕭瑟寒松悲久從園廬
別遂與朋知辭一作相知舊壑蘭杜晚歸軒今已遲

春夢詩云洞庭一作洞房昨夜春風起故人上隔一作遙湘江水枕上片時春

夢中行盡江南數千里

暮秋山行云疲馬臥長坂夕陽下通津山風吹長林颯颯如有人蒼旻霽
涼雨石路無飛塵千念集暮節萬籟悲蕭辰鷓鴣昨夜鳴蕙草色已陳況
在遠行客自然多苦辛

至大梁卻寄康城主人云一從棄漁釣十載干明王無由謁天階卻欲歸
滄浪仲秋至東郡遂見天雨霜昨夜夢故山芳蕙色已黃平明辭鐵丘薄

暮遊大梁仲秋簫條景拔刺飛鵝鷓四郊陰氣閉萬里無晶光長風吹白
茅野火燒枯桑故人南燕吏籍籍名更香聊以玉壺贈置之君子堂
衛尙書赤驃馬歌云君家赤驃畫不得一團旋風桃花色紅纓柴鞞珊瑚
鞭玉鞍錦韉黃金勒請君鞞出看君騎尾長窄地如紅絲白矜諸馬皆不
及卻憶百金新買時香街紫陌鳳城內行人見者誰不愛揚鞭驟急白汗
流弄影行驕碧蹄碎紫髯胡雛金剪刀平明翦出三鬢高櫪上看時獨意
氣衆中牽出偏雄豪騎將獵向南山口城南狐兔不復有草頭一點疾如
飛卻使蒼鷹翻向後憶昨看君朝未央鳴珂擁蓋滿路香始知邊將眞富
貴可憐人馬相輝光男兒意氣得如此駿馬長鳴北風起待君東去掃胡
塵爲君一日行千里

北庭北樓呈幕中諸公云嘗讀西域傳漢家得輪臺古塞千年空陰山獨
崔嵬二庭近西海六月秋風來日暮上北樓殺氣凝不開大荒無鳥飛但
見白龍埽舊國眇天末歸心日悠哉上將新破胡西郊絕煙埃邊城寂無

事撫劍空徘徊幸得趨幕中託身廁羣才早知安邊計未盡平生懷
玉門關蓋將軍歌云蓋將軍眞丈夫行年三十執金吾身長七尺頗有鬚
玉門關城迴且孤黃沙萬里百草枯南隣犬戎北接胡將軍到來備不虞
五千甲士膽力粗軍中無事但歡娛煖屋繡簾紅地爐織成壁衣花氍毹
燈前侍婢瀉玉壺金鑷亂點野駝酥紫綬金章左右趨問著卽是蒼頭奴
美人一雙閒且都朱脣翠眉映月眸清歌一曲世所無今日喜聞鳳將鷁
可憐絕勝秦羅敷使君五馬謾踟躕野草繡窠紫羅襦紅牙鏤馬對樗蒲
玉盤纖手撒作盧衆中誇道不曾輸歷上昂昂皆駿駒桃花叱撥價最殊
騎將獵向城南隅臘月射殺千年狐我來塞外安邊儲爲君取醉酒賸酤
醉爭酒盞相誼呼卻憶咸陽舊酒徒

武威送劉單判官赴西行營使呈高開府云熱海互鐵門火山赫金方白
草磨天涯湖沙莽茫茫夫子佐戎幕其鋒利如霜中歲學兵符不能守文
章功業須及時立身有行藏男兒感忠義萬里忘越鄉孟夏邊候遲胡國

草未長馬疾過飛鳥天窮超夕陽都護新出師五月發軍裝甲兵三百萬
錯落黃金光揭旗拂崑崙伐鼓震蒲昌太白引官軍天威臨大荒西望雲
似蛇戎夷知喪亡渾驅大宛馬繫取樓蘭王曾到交河城風土斷人腸塞
驛遠如點邊烽互相望赤亭多飄風鼓怒不可當有時無人行沙石亂飄
颺夜靜天蕭條鬼哭夾道傍地上多髑髏皆是古戰場置酒高館夕邊城
月蒼蒼軍中宰肥牛堂上羅羽觴紅淚金燭盤嬌歌豔新妝望君仰青冥
短翮難可翔蒼然西郊道握手何慨慷

天山雪送蕭沼歸京云天山有雲常不開千峯萬嶺雲崔嵬北風夜捲赤
亭口一夜天山雪更厚能兼漢月照銀山復逐胡風過鐵關交河城邊飛
鳥絕輪臺路上馬蹄滑晝靄寒氛萬里凝闌干陰崖千丈冰將軍狐裘臥
不煖都護寶刀凍欲斷正是天山雪下時送君走馬歸京師客中何以贈
君別唯有青青松樹枝

走馬川行奉送出師西行云君不見走馬川行滄海邊平沙莽莽黃入天

輪臺九月風夜吼一川碎石大如斗隨風滿地石亂走匈奴草黃馬正肥
金山西見煙塵飛漢家大將西出師將軍金甲夜不脫半夜軍行戈相撥
風頭如刀面如割馬毛帶雪汗氣蒸五花連錢旋作冰幕中草檄硯水凝
虜騎聞之應膽懾料知短兵不敢接車師西門佇獻捷

輪臺歌奉送封大夫出師西征云輪臺城內夜吹角輪臺城北旄頭落羽
書昨夜過渠黎單于已在金山西戍樓西望煙塵黑漢兵屯在輪臺北上
將擁旄西出征平明吹笛大軍行四邊伐鼓雪海湧三軍大呼陰山動虜
塞兵氣連雲屯戰場白骨纏草根劍河風急雪片闊沙口石凍馬蹄脫亞

相勤王甘苦辛誓將報主靜邊塵古來青史誰不見今見功名勝古人
白雪歌送武判官云北風捲地白草折胡天八月卽飛雪忽如一夜春風
來千樹萬樹梨花開散入珠簾溼羅幕孤裘不煖錦衾薄將軍彫弓不得
控都護鐵衣冷難著瀚海闌干千尺冰愁雲黦淡萬里凝中軍置酒飲歸
客胡琴琵琶與羌笛紛紛暮雪下轅門風掣紅旗凍不翻輪臺東門送君

去時雪滿天山路山回路轉不見君雪上空留馬行處

田使君美人舞如蓮花北鋌歌云美人舞如蓮花旋世人有眼應未見高
臺滿地鋪氍毹試舞一曲天下無此曲胡人傳入漢諸客見之驚且歎慢
臉嬌蛾纖復濃輕羅金縷花蔥籠回裾轉袖若飛雪左鋌右鋌生旋風琵琶
橫笛和未市花門一作開山頭黃雲合忽作出塞入塞聲白草胡沙寒颯
颯翻身入破如有神前見後見回回新始知諸曲不可比採蓮落梅徒聒
耳世人學舞祇是舞姿態豈能得如此

參南陽人文本之後登天寶進士第累爲安西關西節度判官入爲司功
二外郎虞庫二正郎出爲嘉州刺史副元帥杜鴻漸表公兼侍御史列於
幕府使罷寓于蜀中原多故卒死于蜀

商璠云參詩語奇體峻意亦新遠至如長風吹白茅野火燒枯桑可謂逸
矣又山風吹空林颯颯如有人頗稱幽致也

參至德中任宣議郎試大理評事攝監察御史左拾遺裴薦杜甫等嘗薦

參識度清遠議論雅正佳名早立時輩所仰可備獻替之官云

...

...

...

...

...

...

...

...

...

...

...

...

...

...

唐詩紀事卷第二十三

唐詩紀事卷第二十四

元傑

章迢

孟彥深

郭受

陶峴

張僊

王昌齡

周萬

包融

顏真卿

丁仙芝

李清

韓滉

齊澣

顧朝陽

韋建

元傑

元傑有須陽果業寺開東嶺洞谷銘并序云陰陽精氣結爲山嶽者則爲勝爲異爲奧爲閼故萬嶺交峙而嵩華辯其方羣嶽靈而數瀛壺拔其類是知仙居靈宅其必有黨乎鳴弦之北趾果業之東阜高不百仞廣纔千畝層巖石室幽谷靈洞殊景異觀秀絕奇偉雖瀑流之下鑪峯懸蹬之躋丹嶠路遠莫覲餘不知其倫擬焉按寺記云昔有方士於是山鍊金變形羽服登仙故石座丹竈至今存焉觀其東嶺削成石瑩如玉岡巒峭竦巖壁重複捫藟而升如造雲根縹緲嬋娟似霞衣可攀真氣勝而塵累捐五

蓋破而清機閒蕩然放懷如羽翼之已生赤城之可接噫境變志遷若符契之協從也下臨長川澄波吐瀾煙霞夕收飛鳥不喧杳渺逶迤流注無閒西直巨壑連嶂如屏林靄朝翠巖光晝清篠蕩藏輝杉松下冥虛豁寂寥涵風有聲緣嶺未極劃開洞門黛容崢嶸詭狀輪囷疑伏龍怪鎮含煙雲又有古木倒傍絕壁盤根網結掛絡空碧崩崖傍傾猿逕下仄羽人幽會此焉瑤席搏翠壁而直上軋崎嶇於紫氛雙巖屹以中斷奔屏蹙而成室涵孕清爽澄凝氣源信列仙之攸居豈塵俗之所止哉嗚呼鶴駕一去鳳簫響絕荆榛蔽路危磴敗滅跡留人境而舉世莫知地聯精刹而羣遊莫至吁可怪乎其晦藏也元和丙申歲秋八月余以膠鬲之困寓居精舍再從兄昭肅時假茲邑政便於人務簡多暇與當寺僧知捷日探道源捷亦好古鑿奇之士也因語故實緬思羽客之玄風以爲靈跡神蹤精誠必復乃操刃持畚履險道幽梯絕棧而歷巉巖排蒙龍而登杳藹時更一稔而神居祕躅粲然皆睹嗟乎芝田玄圃豈遠乎哉天之與人氣通則合客

有顧咨而諗予者或應之曰天之運否泰相濟故善利稱德下民昏墊人之道行藏有數故棘津蓬累時惟鷹揚靈物必通道在斯著不然何荒阻千祀勃焉而興歟乃爲銘曰鑿石通道兮援木枝仰攀洞口兮踐欹危奔龍伏虎兮勢狀奇林攢峯倚兮蟠雲螭下臨陰谷兮神以慄嵌巖石兮洞無極老松簫瑟兮生遠風興雲霈雨兮煙霧黑懸崖排空兮色噴黛堅根網絡兮層霄外披霓解帶兮羽翼生下眺遙江兮入青靄世道紛綸兮何足謂朝爲榮華兮夕顛頽不如幽谷兮閱仙經翼接浮丘兮整煙轡我窺丹竈兮坐山腹衆峯參差兮隱雲族鑿仙嶺兮望瑤臺朝霞照海兮錦綺開信赤松之所升降王喬之所往來道或用晦兮靈物斯潛殷道未昌兮說築傅巖紛予感此兮勒銘雲根山既不朽兮與名長存

韋迢

杜子美在長沙送韋員外迢牧韶州詩云炎海韶州牧風流漢署郎分符先令望同舍有輝光白首多年疾秋天昨夜涼洞庭無過雁書疏莫相忘

迢留別杜員外院長詩云江畔長沙夜相逢纜客船大名詩獨步小郡海
西偏地溼愁飛鵬天災畏跼鳶去留俱失意把臂共潸然

迢早發湘潭寄子美云北風昨夜雨江上早來涼楚岫千峯翠湘潭一葉
黃故人湖外客白首尙爲郎相憶無南雁何時有報章子美酬云養拙江
湖外朝廷記憶疎深慙長者轍重得故人書白髮絲難理新詩錦不如雖
無南雁過看取北來魚

子美後送魏司直掌選嶺南兼寄迢云故人湖外少春日嶺南長憑報韶
州牧新詩昨寄將

孟彥深

字士元天寶末爲武昌令元次山居武昌之樊山新春大雪彥深以詩問
之曰江山十日雪雪深江霧濃起來望樊山但見羣玉峯林鷺卻不語野
獸翻有蹤山中應大寒短褐何以安皓氣凝書帳清著釣魚竿懷君欲進
謁溪滑渡舟難次山酬云積雪閉山路有人到庭前云是孟武昌今獻苦

雪篇長吟未及終不覺爲悽然古之賢達者與世竟何異不能救時患諷
論以全意知公惜春物豈非愛時和知公苦陰雪傷彼災患多姦凶正驅
馳不合問君子林鷲與野獸無乃怨如此兵興向九歲稼穡誰能憂何時
不發卒何日不殺牛耕者日已少耕牛日已希皇天復何忍更又思斃之
自經危亂來觸物堪傷歎見君問何意只益胸中亂山禽飢不飛山木凍
皆折懸泉化爲冰寒爐近不熱出門望天地天地皆昏昏時見雙峯下雪
中生白雲

次山又有雪中懷孟武昌云冬來三度雪農者歡歲稔我麥根已濡各得
在倉廩天寒未能起孺子驚人寢云有山客來籃中見冬葦上生木燒柴爲

溫酒煮鰕爲作瀋

尺甚反
美汁

客亦愛栝樽思君共栝飲所嗟山路閒時節寒

又甚不能苦相邀興盡方就枕次山作退谷銘指曰干進之客不得遊之

作栝湖銘曰爲人厭者勿泛焉

一作勿
泛栝湖

乃曰孟士源嘗黜官無情干進在

武昌不爲人厭可遊退谷可泛栝湖故有招孟武昌詩云武昌不仕進武

昌人不厭退谷正可遊栢湖往來泛湖上有水鳥見人不飛鳴谷中有山
獸往往隨人行莫將車馬來令我鳥獸驚

彥深登天寶二年進士第

郭受

受寄子美詩云新詩海內流傳久舊德朝中屬望勞郡邑地卑饒霧雨江
湖天闊足風濤松醪酒熟傍看醉蓮葉舟輕自學操春興不知凡幾首衡
陽紙價頓能高衡陽出五家紙子美酬郭十五判官云才微歲老尙虛名
臥病江湖春復生藥裹關心詩總廢花枝照眼句還成只同燕石能星隕
自得隋珠覺夜明橋口橘舟風浪促繫帆何惜片時程

受大歷閒衡陽判官也

陶峴

峴彭澤之孫也開元末家崑山泛遊江湖自製三舟與孟彥深孟雲卿焦
遂共載吳越之士號爲水仙省親南海獲崑崙奴名摩訶善游水至西塞

山下泊舟吉祥佛舍見江水深黑謂必有怪物投劍命摩訶下取久之支
體磔裂浮於水上峴流涕迴棹賦詩自敘不復遊江湖矣詩云匡廬舊業
是誰主吳越新居安此生白髮數莖歸未得青山一望計還成鴉翻楓葉
夕陽動鷺立蘆花秋水明從此捨舟何所詣酒旗歌扇正相迎

張侑

辭房相公云秋風颯颯雨霏霏愁絕栖惶一布衣辭君且作隨陽雁海內
無家何處歸

王昌齡

獨遊詩云林臥情自閒獨遊景常晏時從灞陵下垂釣往南澗手攜雙鯉
魚目送千里雁悟彼飛有適知此罹憂患放之清冷泉因得省疎慢永懷
青岑客迴首白雲閒神超物無違豈繫名與宦

齋心詩云女蘿覆石壁溪水幽濛籠紫葛蔓黃花娟娟寒露中朝飲花上
露夜臥松下風雲英化爲水光彩與我同日月蕩精魄寥寥天府空

篳篥引云瀘谿郡南夜泊舟夜聞南岸羌戎謳其時月黑猿啾啾微雨霑
衣令人愁有一遷客登高樓不言不寐彈篳篥彈作薊門桑葉秋風沙颯
颯青冢頭將軍鐵驄汗血流深入匈奴戰未休黃旗一點兵馬收亂殺胡
人積如丘瘡病驅來配邊州仍披漠北羊羔裘顏色饑枯掩面羞眼眶滴
淚深兩眸還思本鄉食犛牛欲語不得指咽喉或有強壯能咿嚶意說被
他邊將讐五世屬蕃漢主留碧毛氍帳河曲遊橐駝五萬部落稠勅賜飛
鳳金兜鍪爲君百戰如過籌靜掃陰山無鳥投家藏鐵券特承優黃金千
斤不稱求九族分離作楚囚深谿寂寞絃苦幽草木悲感聲颼颼僕本山
東爲國憂明光殿前論九疇羸讀兵書盡冥搜爲君掌上施權謀洞曉山
川無與儔紫宸發詔遠懷柔搖筆飛霜如奪鉤鬼神不得知其由憐愛蒼
生比虬蜉綠河屯兵須漸抽盡遣降來拜御溝便令海內休戈矛何用班
超定遠侯史臣書之得已不

長信秋云金井梧桐秋葉黃珠簾不捲夜來霜熏籠玉枕無顏色臥聽南

宮清漏長又奉帚平明金殿開且將團扇共徘徊玉顏不及寒鴟色猶帶
昭陽日影來

西宮秋怨云芙蓉不及美人妝水殿風來珠翠香誰分含啼掩秋扇空懸

明月待君王

啼一作精

西宮春怨云西宮夜靜百花香欲掩珠簾春恨長斜抱雲和深見月朦朧
樹色隱朝陽

青樓怨云香幃風動花入樓高調鳴箏緩夜愁腸斷關山不解說依依殘
月下簾鉤

送李灌遊江東詩云清洛日夜漲微風引孤舟離觴便千里遠夢生江樓
楚國橙橘暗吳門煙雨愁東南具今古歸望山雲秋

放歌行云南渡洛陽津西望十二樓明堂坐天子月朔朝諸侯清樂動千
門皇風被九州慶雲從東來泱泱抱日流昇平論貴道文墨將何求有詔
徵草澤微誠將獻謀冠冕如星羅拜揖曹與周望塵非吾事入賦且遲留

幸蒙國士識因脫負薪裘今者放歌行以慰梁甫愁但榮數斗祿奉養每
豐羞願得金膏遂飛雲亦可籌

代扶風主人答云煞氣凝不流風悲日彩寒浮塵起四遠遊子彌不歡依
然宿扶風沽酒聊自寬寸心亦未理長缺誰能彈主人就我飲對我還慨
歎一作然便泣數行淚因歌行路難十五役邊城三迴討樓蘭連年不解甲

積日無所滄將軍降匈奴國士一作使沒桑乾去時三十萬獨自還長安不

信沙場苦君看刀箭瘢鄉親悉零落冢墓亦摧殘仰攀青松枝慟哭傷心
肝禽獸悲不去路旁誰忍看幸逢休明代寰宇靜波瀾老馬思伏櫪長鳴
力已殫少年與君會何事發悲端天子初封禪賢良刷羽翰三邊悉如此
否秦亦須觀

鄭縣宿陶太公館中贈馮六元二云儒有輕侯王脫略當世譽本家藍溪
下非爲魚弋故無何困躬耕且欲馳永路幽居與君近出谷同所務昨日
辭石門五年變秋露雲龍未相感干謁亦以屢子爲黃綬羈予忝蓬山顧

京門望西岳百里見郊樹飛雨祠上來靄然關中暮馳車鄭城宿秉燭論
往素山月出華陰開此河渚霧清光比故人豁達展心晤馮公尙戢翼元
子仍跼步拂衣易爲高淪跡難有趣張范善終始吾等豈不慕罷酒當涼
風屈伸備冥數

小敷谷龍潭祠作詩云崖谷橫疾流地中有雷集百泉勢相蕩巨石皆卻
立跳波沸崢嶸昏清不可挹昏爲蛟龍怒清見雲雨入靈怪崇偏祠廢興
自茲邑沈淫頃多昧簷宇遂不葺吾聞被明典盛德惟世及生人載山川
血食報原隰豈伊駭微險將以循眈捐奔飛振呂梁忠信亦我習波流侵
已廣悔吝在所及溪水有清源褰裳靡沾溼

過華陰詩云雲起太華山雲山互明滅東風始含景了了見松雪羈人感
幽棲省映轉奇絕欣然忘所疲永望吟不輟信宿百里餘出關翫新月何
意昨來心遇物遂遷別人生屢如此何以肆愉悅

出柳山口至壘石灣野人室中寄張十一詩云櫛栴無冬春柯葉連峯稠

陰壁下蒼黑煙含清江樓景開獨沿曳響答隨興酬旦夕望吾友如何迅
孤舟壘沙積爲岡崩剝雨露幽石脈盡橫亘潛潭何時流既見萬古色頗
盡一物由水與世人遠氣還草木收盈縮理無餘今往何必憂郴土羣山
高耆老如中州孰云議外降豈是娛宦遊陰火昔所服丹砂將爾謀昨臨
蘇耽井復向衡陽求同疚來相依脫身當有籌數月仍離居風湍成阻修
野人善竹器童子能溪謳寒月波蕩漾羈鴻去悠悠

同疚一作問疚

九江口作云潏潏江勢闊雨開潯陽秋驛門是高岸望盡黃蘆洲水與五
溪合心期萬里遊明時無棄才謫去隨孤舟鷺鳥立寒木丈夫佩吳鉤何
當報君恩卻繫單于頭

從軍行二首云向夕臨大荒朔風軫歸慮平沙萬里餘飛鳥宿何處虜騎
獵長原翩翩傍河去邊聲搖白草海氣生黃霧百戰起風塵十年履霜露
雖投定遠筆未坐將軍樹早知行路難悔不理章句又秋風馬蹄輕角弓
持絃急去爲龍城戰正值胡兵襲軍氣橫大荒戰酣日將入長風金鼓動

白露鐵衣溼四起愁邊聲南庭時竚立斷蓬孤自轉寒雁飛相及萬里雲
沙漲平原冰霰澁惟聞漢使還獨向刀環泣

昌齡字少伯江寧人中第補校書郎又中博學宏辭科遷汜水尉不護細
行還鄉里因世亂爲刺史閭丘曉所殺工詩縝而思清時謂王江寧

商璠云元嘉已還四百年內曹劉陸謝風骨頓盡今昌齡克嗣厥跡如明
堂坐天子月朔朝諸侯清樂動千門皇風被九州慶雲從東出泱漭抱日
流又獨飲霸上亭寒山清門外長雲驟日落東來跡已晦又蒼荻寒滄江
石頭岸邊飲又長亭酒未酣千里風動地又京門望西岳百里見郊樹飛
雨祠下來靄然關中暮又奸雄乃得志遂使羣心搖赤風蕩中原烈火無
遺巢一人計不用萬里空蕭條又百泉勢相蕩巨石皆卻立昏爲蛟龍怒
青見雲雨入又去時三十萬獨自還長安不信沙場苦君看刀箭瘢又雲
起太華山雲山互明滅東風始含景了了見松雪又櫛栴無冬春柯葉連
峯稠險壁下蒼黑煙含清江樓疊沙積爲岡崩剝雨露幽石脈盡橫巨潛

潭何時流斯並驚耳駭目略舉其十數句則中興高作可知矣予嘗觀昌齡齋心詩弔軹道賦謂其人孤潔恬澹與物無傷晚節謗議沸騰言行相背及淪洛竄謫竟未減才名固知善毀者不能掩西施之美也

毛本云與河岳英靈

集小

周萬

送沈芳謁李觀察求仕進詩云往日長安路歡遊不惜年爲貪盧女曲用盡沈郎錢身老方投刺途窮始著鞭猶聞有知己去去不徒然

萬開元末登第

包融

送國子張主簿詩云潮岸纜初解鸞啼別離處遙見舟中人時時一回顧坐悲芳歲晚花落清軒樹春夢隨我心搖揚逐君去

融潤州延陵人歷大理司直二子何佶齊名世稱二包孟浩然宴包二融宅詩云閒居枕清洛左右接大野門庭無雜賓車轍多長者是時方盛夏

風物自蕭洒五日休沐歸相攜竹林下開襟成歡趣對酌不能罷煙暝栖
鳥還余將歸白社

顏真卿

吳門有清遠道士同沈恭子遊虎丘詩其辭自商周歷近代抑二千年來
矣鬼神耶隱士耶莫能測也而辭藻健俊魯公愛之刻於巖際并有所作
衛公又次而和之清遠道士詩云我本長殷周遭罹歷秦漢四瀆與五岳
名山盡幽竄及此寰區中始有近峯翫近峯何鬱鬱平湖眇瀾漫吟挽川
之陰步上山之岸山川共澄澈光彩交凌亂白雲滂欲歸青松忽消半客
去川鳥靜人來山鳥散谷深中見日崖幽曉非旦聞子盛遊遨風流足詞
翰嘉茲好松石一言常累歎勿謂余鬼神忻君共幽讚魯公詩云不到東
西寺于今五十春竭來從舊賞林壑宛相親吳子多藏日秦皇厭聖宸劍
池穿萬仞盤石坐千人金氣騰爲虎琴臺化若神登壇仰生一捨宅歎珣
珉中嶺分雙樹迴巒絕四鄰窺臨江海接崇飾四時新客有神仙者於茲

雅麗陳名高，清遠峽文聚。斗牛津跡異，心寧閒聲同。質豈均悠然，千載後
知我揖光塵。衛公詩云：茂苑有靈峯，嗟余未遊觀。藏山在平陸，壤谷爲高
岸。岡繞數仞牆，巖潛千丈幹。乃知造化意，迴幹資奇翫。鏐騰昔虎踞，劍沒
常龍渙。潭黛入海底，崑岑聳霄半。層巒未深日，哀狝寧知旦。綠篠夏凝陰，
碧林秋不換。冥搜既窈窕，迴望何蕭散。川曉嵐氣收，江春雜英亂。逸人輟
清藻，前哲留篇翰。共扣哀玉音，皆舒文繡段。難追彥回賞，
褚彥回見凡人所稱常過其實

見虎丘則過其所聞徒起興公歎，一夕如再升。含毫星斗爛。

真卿與耿漳水亭詠風聯句有度琴方解慍臨水已迎秋之句

丁仙芝

長寧公主舊山池，詩云：平陽舊池館，寂寞使人愁。座卷黃流簾，簾垂白玉
鉤。庭閒花自落，門閉水空流。追想吹簫處，應隨山騎遊。

越裳貢白雉，云：聖哲承休運，伊臯列上台。覃恩丹徼遠，入貢素羣來。北闕
欣初見，南枝願未迴。斂容殘雪靜，矯翼片霜開。馴擾將無懼，翻飛幸不猜。

甘從上林裏飲啄自徘徊毛本一作孫胤昌詩

李清

詠石季倫云金谷繁華石季倫只能謀富不謀身當時縱與綠珠去猶有
無窮歌舞人 清登天寶十二年進士第

韓滉

晦日呈諸判官云晦日新晴春日嬌萬家攀折度長橋年年老向江城寺
不覺春風換柳條

聽樂悵然自述云萬事傷心對管絃一身含淚向春煙黃金用盡教歌舞
留與他人樂少年

滉字太沖貞元初加同平章事江淮轉運使二年封晉國公初有美名所
與遊皆天下豪俊其詩與孟浩然酬唱云

齊澣

長門怨云營營孤思逼寂寂長門夜妾妬亦知非君恩那不惜攜琴就玉

堦調悲心未諧將心寄明月流影入君懷

澣字洗心定州人開元閒與蘇晉蘇頌賈曾韓休許景先遜逃典詔誥爲
代言最杜暹當國表宋璟爲吏部尙書澣及蘇晉爲侍郎世謂臺選常稱
陳希烈苗晉卿之才後皆大顯

顧朝陽

昭君怨云莫將鉛粉匣不用鏡花光一去邊城路何情更畫妝影銷胡地
月衣盡漢宮香妾死非關命都緣怨斷腸

朝陽開元閒詩人

韋建

泊舟吁眙云維舟淮水次霜降夕流清夜久潮侵岸天寒月近城平沙依

雁宿候館聽鷄鳴鄉國雲霄外誰堪羈旅情

毛本云一作常建作

建與蕭穎士最善

唐詩紀事卷第二十四

唐詩紀事卷第二十五

徐安貞

崔惠童

崔敏童

劉晏

劉灣

薛據

劉昫

張巡

張繼

張謂

梁肅

柳渾

孟雲卿

徐安貞

畫襄陽圖云畫得襄陽郡依然見昔遊峴山思駐馬漢水憶回舟丹壑常
含霽青林不換秋圖書空咫尺千里意悠悠

安貞始名楚璧應制舉三登甲科開元中爲中書舍人集賢學士帝屬文
多令視草終中書侍郎在中書省久李林甫用事或言計議多所參助云
或云安貞天寶後以林甫之故避罪衡山岳寺李北海遊岳識之因戲曰
峴山思駐馬漢水憶回舟暮雨衣猶溼春風帆正開抑能記否因同載北
歸至長沙謂守者曰瀟湘逢故人若幽谷之覩太陽不然委填巖穴矣

崔惠童

宴城東莊云一月人生笑幾回相逢相識且銜盃眼看春色如流水今日
飛花昨日開

尙明皇晉國公主

崔敏童

宴城東莊云一年始有一年春百歲曾無百歲人能向花中幾回醉十千
沾酒莫辭頻

惠童昆弟也

一作兄

劉晏

明皇御勤政樓大張樂羅列百技時教坊有王大娘者戴百尺竿竿上施
木山狀瀛州方丈令小兒持絳節出入於其閒歌舞不輟時劉晏以神童
爲祕書正字方十歲帝召之貴妃置之膝上爲施粉黛與之巾櫛帝問晏
汝爲正字正得幾字晏曰天下字皆正惟朋字未正得貴妃復令詠王大
娘戴竿晏應聲曰樓前百戲競爭新唯有長竿妙入神誰謂綺羅翻有力

猶自嫌輕更著人因命牙笏及黃紋袍賜之

晏八歲獻頌泰山行在帝命張說試之說曰國瑞也卽授太子正字公卿邀請旁午號神童晏字士安

劉灣

字靈源彭城人天寶進士天寶之亂以侍御史居衡陽元結送王契佐卿入蜀序曰與佐卿去者有清河崔異與次山住者有彭城劉灣相醉相留幾日江畔

出塞曲云將軍在重圍音信絕不通羽書如流星飛入甘泉宮倚是并州兒少年心膽雄一朝隨召募百戰爭王公去年桑乾北今年桑乾東死是征人死功是將軍功汗馬敗秋月疲人臥霜風仍聞左賢王更欲圍雲中卽席賦露中菊云衆芳春競發寒菊露偏滋受氣何曾異開花獨自遲晚成猶有分欲採未過時勿棄東籬下看隨秋草衰

元次山作劉侍御月夜讌會序云兵興以來十一年矣獲與同人懽醉達

且歌詠取適無一二焉乙巳歲彭城劉靈源在衡陽逢故人或有在者日夕相會第寬遠遊始與諸公待月而笑語竟與諸公愛月而懽醉詠歌夜久賦詩言懷於戲文章道喪蓋亦久矣時之作者煩雜過多歌兒舞女且相喜愛系之風雅誰道是耶諸公嘗欲變時俗之淫靡爲後生之規範今夕豈不能道達情性成一時之美乎次山詩曰我從蒼梧來將耕舊山田踟躕爲故人且復停歸船日夕得相從轉覺和樂全愚愛涼風來明月正滿天河漢望不見幾星猶燦然中夜興欲酣改坐臨清川未醉恐天旦更欲促繁絃懽娛不可逢請君莫言旋

薛據

出青門往南山下別業云舊居在南山夙駕自城闕榛莽相蔽虧去爾漸超忽散漫餘雪晴蒼茫季冬月寒風吹長林白日原上沒懷抱曠莫伸相知阻胡越弱年好棲隱鍊藥在巖窟及此離垢氛興來亦因物末路期赤松斯言庶不伐

西陵口觀海云浙江漫湯湯近海勢彌廣在昔胚暉凝融爲百川長地形失端倪天色潛滉濇東南際萬里極目遠無象山影乍浮沈潮波忽來往孤帆或不見棹歌猶嚮像日暮長風起客心空振蕩浦口霞未收潭心月初上林嶼幾遶迴亭臯時偃仰歲晏訪蓬瀛真遊非外獎

據與王摩詰杜子美最善子美有喜薛三據授司議郎詩云文章開窈奧遷擢潤朝廷又有寄薛三郎中詩云與子俱白頭役役常苦辛雖爲尙書郎不及村野人天未厭戎馬我輩本常貧子尙客荊州我亦滯江濱聞子心甚壯所過信席珍賦詩賓客閒揮酒動八垠乃知蓋代手才力老益神其略如此

據自永樂主簿陟縣丞復選宰涉劉長卿贈詩云棲鸞往已屈馴翟今可嗣此道如不移雲霄坐應致縣前潭水綠郭外晉山翠日得謝客游時堪陶令醉高適淇上寄據云故交負靈奇逸氣包謇諤陰軫經濟具縱橫建安作

據開元中自恃才名於吏部參選請受萬年錄事諸流外官共見執政訴之曰赤縣錄事清要官今被進士奪去某等色人無措手足矣遂罷商璠云據爲人骨鯁兼有氣魄其文亦爾自傷不早達故著古興詩云投珠恐見疑抱玉但垂泣道在君不舉功成歎何及怨憤頗深至如寒風吹長林白日原上沒又窮冬時晷短日盡西南天可謂曠代之佳句也

據河中寶鼎人中書舍人文思曾孫父元暉什邡令開元天寶閒據與弟播摠相繼登科終禮部侍郎

省署開文苑滄浪學釣翁據之詩也子美懷據詩乃云獨當省署開文苑兼泛滄浪學釣翁

據古興云日中望雙闕軒蓋揚飛塵鳴珮初罷朝自言皆近臣光華滿道路意氣安可親歸來宴高堂廣筵羅八珍僕妾盡錦綺歌舞夜達晨四時自相代誰能久要津已看覆前車未見改後輪丈夫須兼濟豈得樂一身君今皆得志肯顧憔悴人

初去郡書情云肅徒辭汝穎懷古獨悽然尙想文王化猶思巢父賢時移
多讒巧大道竟誰傳况是疾風起悠悠旌旆懸征鳥無返翼歸流不停川
已經霜露下乃驗松柏堅回首望城邑迢迢閒雲煙志士不傷物小人皆
自妍感時唯責已在道非怨天從此適樂土東歸知幾年

劉脊虛

贈喬林云去年上策不見收今年寄食仍淹留羨君有酒能共醉羨君無
錢能不憂如今五侯不待客羨君不問五侯宅如今七貴方自尊羨君不
過七貴門丈夫會應有知己世上悠悠何足論

寄閻防云青冥南山色君與緇錫鄰深路入古寺亂花隨暮春紛紛對寂
寞往往落衣巾松色空照水經聲時有人晚心復南望山遠情獨親應以
修往業亦唯立此身深林度空夜煙月資清真莫歎文明日彌年從隱淪
九日送人云海上正搖落客中還別離同舟去未已遠送新相知流水意
何極滿尊徒爾爲從來菊花節早已醉東籬

江南曲云美人何蕩漾湖上風日長玉手欲有贈徘徊雙鳴璫唱歌一作歌聲

隨綠水怨色起春陽日暮還家望煙雲

雲一作波

橫洞房

登廬山峯頂寺云孤峯臨萬象秋氣何高清新天際南郡出林端西江明山門二緇叟振錫聞幽聲心照有無界業懸前後生徒知真機靜尙與愛網并方首金門路未遑參道情

暮秋揚子江寄孟浩然云木葉紛紛下東南日煙

雨一作

霜林山相曉暮天

海深青蒼暝色空復久秋聲亦何長孤舟兼明月獨夜仍越鄉寒笛對京口故人在襄陽詠思勞今夕江漢遙相望

海上云何處歸且遠送君東悠悠滄溟千萬里日夜一孤舟曠望絕國所微茫天際愁有時近仙境不定若夢遊或見青色石孤山百丈秋前心方杳眇此路勞夷猶離別惜吾道風波竟遑

一作敬皇

休春浮花氣遠思逐海水

流日暮離歌後永懷空滄洲

鄭處誨明皇雜錄云天寶末劉希夷王泠然王昌齡祖詠張若虛張子容

孟浩然常建李白劉昫虛崔曙杜甫雖有文章盛名皆流落不偶
商璠云昫虛詩情幽興遠思苦語奇忽有所便驚衆聽頃東南高唱者
十數人然聲律婉然無出其右雖氣骨不逮諸公自永明以來可傑立江
表至如松色空照水經聲時有人又滄溟千萬里日夜一孤舟道自白雲
靜春與清溪長時有落花至遠隨流水香開門向溪路深柳讀書堂幽暝
每日落清輝照衣裳並方外之言也惜其不永天年隕碎國寶

王昌齡宿京江口期昫虛不至詩云霜天越長望殘月生海門風靜夜潮
滿城高寒氣昏故人何寂寞久已乖清言明發不能寐徒盈江上鱗又送
昫虛歸取宏詞解云天清聞海鶴遊子引鄉眄聲隨羽儀遠勢與歸雲便
青桂春再榮白雲暮來變遷飛在禮儀豈復淚如霰

孟浩然九日於龍沙寄劉大昫虛云龍沙豫章北九日掛帆過風俗因時
兄湖山發興多客中誰送酒棹裏自成歌歌竟乘流去滔滔任夕波

張巡

守睢陽日嘗賦詩曰接戰春來苦孤城日漸危合圍侔月暈分陣效魚麗
屢厭黃塵起時將白羽揮褰瘡猶出戰飲血更登陴忠信應難敵堅貞自
不移無人報天子心計欲何施

又夜聞笛云峇巖試一臨虜騎俯城陰不辨風塵色安知天地心營開星
月近戰苦陣雲深旦夕更樓上遙聞橫笛吟

巡謝金吾將軍表曰相峩眉之碧峯豫遊西蜀追綠耳於玄圃保壽南山
逆賊祿山殺戮黎獻羶腥闕庭臣被圍四十七日凡一千八百餘戰主辱
臣死當臣效命之時惡稔罪盈是賊滅亡之日

巡祭纛文曰太乙先鋒蚩尤後殿蒼龍持弓白虎捧箭祭城隍云智井鳩
翔危堞龍攫皆文武雄健志氣不衰真忠烈士也

巡字巡鄧州人博通羣書爲文章不立藁以忠義死睢陽

張繼

閬門卽事云耕夫占募逐樓船春草青青萬頃田試上吳門看郡郭清明

幾處有新煙

清明日西午橋至瓜巖村有懷云晚霽龍門雨春生汝穴風鳥啼官路靜
花發毀垣空鳴玉慚時輩垂絲學老翁舊遊人不見惆悵洛城東
洛陽作云洛陽天子縣金谷石崇鄉草色侵官道花枝出苑牆書成休逐
客賦罷遂爲郎貧賤非吾事西遊思自強

春夜皇甫冉宅對酒云流落時相見悲歡共此情興因罇酒洽愁爲故人
輕暗滴花垂露斜輝月過城那知橫吹笛江外作邊聲

安公房問法云流年一日復一日世事何時是了時試向東林問禪伯遣
將心地學琉璃

楓橋夜泊云月落烏啼霜滿天江楓漁火對愁眠姑蘇城外寒山寺夜半

鐘聲到客船

此地有夜半鐘謂之無常鐘繼誌其異耳歐陽以爲語病非也

高仲武云張繼員外累代詞伯積襲弓箕其於爲文不雕不飾及爾登第
秀發當時詩體清迥有道者風如女停襄邑杼農廢汝陽耕使者乘軒去

諸侯擁節迎火燎原猶熱波搖海未平比興深矣

繼字懿孫襄州人登天寶進士第大曆末檢校祠部員外郎分掌財賦於洪州送郗紹充河南租庸判官云齊魯傷心地頻年此用兵女停襄邑杼農廢汶陽耕使者乘輅去諸侯擁節迎深仁佐君子薄賦卹黎甿火燎原猶熱波搖海未平應將否泰理一問魯諸生感懷云調與詩人背心將靜者論經年帝城裏不識五侯門

伉儷歿於洪州劉長卿哭張員外云白簡曾連拜滄洲每共思撫存憐齒穉歎逝顧身衰一自辭張劭何由見戴逵獨聞山吏部流涕訪孤兒

張謂

代北州老翁答詩云負薪老翁往北州北望鄉關生客愁自言老翁有三子兩人已向黃沙死如今小男新長成明年聞道更徵兵定知此別必零落不及相隨同死生盡將田宅借鄰伍且復伶俜去鄉土在生本求多子孫及有誰知更苦辛近傳天子尊武臣強兵直欲靜胡塵安邊自合有長

策何必流離中國人

送盧舉使河源詩云故人行役向邊州正馬今朝不少留長路關山何日盡滿堂絲管爲君愁

同諸公遊雲公禪院云共許尋鷄足誰能惜馬蹄長空淨雲雨斜日半虹蜺簷下千峯轉窗前萬木低看花尋逕遠聽鳥入林迷地與喧卑隔人將物我齊不知樵客意何事武陵溪

送青龍一公云事佛輕金印勤王度玉關不知從樹下還許到人閒楚水青蓮淨吳門白日閒聖朝須助理切莫愛東山

哭護國上人云昔喜三身淨今悲萬劫長不應歸北斗多是向西方舍利衆生得袈裟弟子將鼠行殘藥枕蟲網舊繩牀別起千花塔空留一草堂支公何處在神理竟茫茫

麓山精舍送莫侍御歸寧云何處堪留客香林隱翠微薜蘿通驛騎松竹掛朝衣霜引臺烏集風驚塔鴈飛飲茶勝飲酒聊以送將歸

謂同王徵君湘中有懷云八月洞庭秋瀟湘水北流還家萬里夢爲客五
更愁不用開書表偏宜上酒樓故人京洛客何日復同遊

玉清公主挽歌云學鳳年猶小乘龍日尙賒初封千戶邑忽駕五雲車地

接金人岸山通玉女家秋風何太早吹落禁園花

代宗
之女

謂湖中對酒行云夜坐不厭湖上月晝遊不厭湖上山眼前一罇又長滿
心中萬事如等閒主人有黍百餘石濁醪數斗應不惜卽今相對不盡歡
別後相思復何益茱萸灣頭歸路賒願君且宿黃翁家風光若此人不醉
參差辜負東園花

商璠云謂代北州老翁答及湖中對酒行並在物情之外衆人未曾說耳
亦何必歷遐遠探古跡然後始爲冥搜

乾元中謂以尙書郎出使夏口沔州牧杜公觴于江城南湖謂命李白標
之嘉名白目爲郎官湖云

謂登天寶二年進士第奉使長沙作長沙風土記云巨唐八葉元聖六載

正言待罪湘東

謂大曆閒爲禮部侍郎典七年八年九年貢舉

梁肅

肅字欽之世居陸渾肅復杜佑交薦辟終右補闕崔恭序其文以肅文雖多而無適時之用故以皇甫士安比之

肅贊四皓云秦失其鹿豪傑並逐鸞鳳何依白雲深谷英英南山采采紫芝漢以劍起吾誰與歸栖心化元澹泊無爲禮物雖至先生默而惟彼身名確不可轉儲皇不安我德用顯大君是驚惠位是寧四公屈身天下和平弋者何思鴻飛冥冥

柳渾

貞元中牡丹多渾詩云近來無奈牡丹何數十千錢買一窠今朝始得分

明見也共戎葵不校多

見西陽雜俎

渾字夷曠不樂拘檢爲貞元宰相

孟雲卿

宋郊詩云徘徊宋郊上不見平生親獨立正傷心悲風來孟津大方載羣物生死有常倫虎豹不相食哀哉人食人豈知逢世運天道亮云云又云太虛流素月三五何皎明光耀侵白日賢愚迷至精四時更變化天道有虧盈常恐今已沒須臾復更生

雲卿鄴城懷古云朝發淇水南將尋北燕路魏家舊城闕寥落無人住伊昔天地屯曹公獨中據羣臣將北面白日忽西暮三臺竟宋寥萬世難長固雄豪安在哉衰草霑霜露崔巍長河北尙見應劉墓古樹藏龍蛇荒茅伏狐兔永懷故池館數子連章句逸興驅山河雄辭變雲霧我行覩遺跡精爽如相遇斗酒將酌君悲風白楊樹

古挽歌云草草閭巷喧塗車儼成位冥寂何所須盡我生人意此去路非遠此別終天地臨穴頻撫棺至哀反無淚爾形未衰老爾息猶童稚骨肉安可離皇天苦容易房帳卽虛張庭宇爲哀吹薤露歌若斯人生盡如寄

別離曲云結髮生別離相思復相保何知日已久五變庭中草渺渺天海
途悠悠吳江島但懼不出門出門無遠道遠道行既難家貧衣服單嚴風
吹積雪晨起鼻辛酸人生各有戀豈不懷爾安分明天上日生死誓同觀

一作
歡

傷懷疇故友詩云稍稍晨鷄翔淅淅草上霜人生早艱苦壽命恐不長二
十學已成三十名不彰豈無同門友貴賤易中腸驅馬行萬里悠悠過帝
鄉幸因絃歌末得上君子堂衆樂互喧奏獨余備笙簧坐中無知音安得
神洋洋願因高風起上感白日光

古離別云朝日上高臺離人怨秋草但見萬里天不見萬里道君行本遙
遠苦樂誠難保宿昔夢同衾心憂夢顛倒含酸欲誰訴轉轉傷懷抱白髮
年已深征行去何早寒暄有時謝憔悴難再好人皆算年壽死者何曾老
少壯無會期水深風浩浩

高仲武云孟君詩祖述沈千運賊中十首又漁獵陳拾遺詞氣傷苦怨者

之流如虎豹不相食哀哉人食人方於七哀路有饑婦人抱子棄草閒則
雲卿深矣雖校之於陳沈纔能升堂猶未入室然當今古調無出其右者
一時之英也余感君平生好古著格律門論及譜二篇以攝其體統

羣物歸大化六龍頹西荒感懷句安知浮雲外日月不運行苦雨句孤兒去慈

親孤客喪主人莫吟辛苦曲此曲誰忍聞可聞不可說去去無期別行人
念前程不待參辰沒朝亦常常苦饑暮亦常常苦饑飄飄萬里餘貧賤多是非
少年莫遠行遠行多不歸悲哉行右張爲取作主客圖以雲卿爲高古奧逸

主

雲卿與杜子美元次山最善

雲卿河南人元次山送孟檢書往南海云雲卿與次山同州里以辭學相
友少次山六七歲聲名滿天下知已在朝廷及次山之年何事不可勿愛

羅浮往而不歸也

唐詩紀事卷第二十五

唐詩紀事卷第二十六

盧象 閻防 王季友 楊賁 張陵

王之渙 李陽冰 蘇渙 劉長卿 章八元

李穆 韋應物 朱放 孫逖 李紆

畢耀

盧象

象題叔徵君東谿草堂云關一作開山十餘里青壁森相倚欲識堯時天東

谿白雲是雷聲轉幽壑雲氣杳流水澗影生蟲蛇巖端翳檉梓大道終不

易君恩曷能已鶴羨無老時龜言攝生理浮年笑六甲元化潛一指未暇

掃雲梯空慚阮家子又云今朝共遊者得性閒未歸已到仙人家莫驚鷗

鳥飛水深嚴公釣松挂巢父衣雲氣轉幽寂谿流無是非名理未足羨腥

臊詎所希自惟負真意何歲當食薇

象自江東止田園移莊慶會未幾歸汶上小弟幼妹尤悲其別賦詩云謝

病始告歸依然入桑梓家人皆佇立相候衡門裏疇類皆長年成人舊童子
上堂家慶畢顧與親姻邇論舊或餘悲思存且相喜田園轉蕪沒但有
寒泉水衰柳日蕭條秋光清邑里入門乍如客休騎非便止中飲顧王程
離憂從此始兩妹日長成雙鬢將及人已能持寶瑟自解掩羅巾念昔別
時小未知疎與親今來識離恨掩淚方殷勤小弟更孩幼歸來不相識同
居雖漸慣見人猶默默宛作越人言殊甘水鄉食別此最爲難淚盡有餘

憶

毛本云又見摩詰集分三首

送祖詠云田家宜伏臘歲晏子言歸石路雪初下荒村鷄共飛東原多煙
火北澗隱寒暉滿酌野人酒倦聞鄰女機胡爲困樵採幾日被朝衣

贈張均員外云公門世業昌才子冠裴王出自平津邸還爲吏部郎神仙
餘氣色列宿動輝光夜直南宮靜朝趨北禁長時人窺水鏡明主賜衣裳
翰苑飛鸚鵡天池待鳳凰承懽疇日顧未記後時傷去去圖南遠微才幸

不忘

趙都護宴別云結髮候旌麾元戎復在斯門開都護府兵動羽林兒黠虜
多翻覆謀臣有別離智同天所授恩共日相隨漢使開賓幕胡笳送酒卮
風霜凝馬首雨雪事魚麗上策應無戰深情屬載馳不應行萬里明主寄
安危

象字緯卿劉夢得紀其文云公始以章句振起於開元中與王維崔顥比
肩驤首鼓行於時妍詞一發樂府傳貴由前進士補秘書郎轉右衛倉曹
掾丞相曲江公方執文衡揣摩後進得公深器之擢爲左補闕河南府司
錄司勳員外郎名盛氣高少所卑下爲飛語所中左遷齊邠鄭三郡司馬
入爲膳部員外郎大盜起幽陵入洛師執公脅之從伍中謫果州長史又
貶永州司戶移進長史詔拜主客員外郎道病留武昌遂不起故相崔大
傅時爲右史方在鄂以文誌其墓其詞曰噫公妙年有聲振耀當代翱翔
雲路不虞矰繳盛名先物易生疵癘三至郎省坐成遺臺踰澄江皋栖栖
沒齒見知者恨之劉夢得董挺詩集序云嘗所游皆青雲之士聞名如盧

杜員外象高韻如包李祭酒佶迭以章句揚於當時

商璠云象詩雅而不素有大體得國士之風曩在校書名光秘閣如靈越山多秀新安江甚清盡東南之數郡也竹里館云江南水不閉山澤氣潛通臘月聞山鳥寒崖見蟄熊柳林青半合荻笋亂無叢回首金陵岸依依向北風

閣防

百丈谿新理茅茨讀書云浪跡棄人世還山自幽獨始傍巢由踪吾其獲心曲荒庭何所有老樹半空腹秋蜩鳴北林暮鳥穿我屋棲遲樂遵渚恬曠寡所欲開卦推盈虛散帙攻節目養閒廢人事達命知止足不學東國儒俟時勞伐輻

秋晚石門禮佛云輕策凌絕壁招提謁金仙舟車無由徑嶠乃屬天躑躅淹異景夷猶望心懸石門變暝色谷口生人煙陽鴈叫平楚秋風急寒川馳暉若代謝浮脆慙身堅永欲臥丘壑息心依梵筵誓將歷劫願無以外

物牽

宿岸道人精舍云早歲參道風放情已寥廓重息知心侶遂果巖中諾歛
跡辭人間杜門守寂寞秋風翦蘭蕙霜氣冷淙壑山牖見然燈竹房聞搗
藥願言拾塵事所趣非龍蠖

夕次鹿門山云龐公嘉遯所浪跡難追攀浮舟暝始至抱杖聊自閒雙巖
開鹿門百谷集珠灣噴薄湍上水春容漂裏山焦原足險峻梁壑未成難
我行自春仲夏鳥語綿蠻蕙草色已晚客心殊未還遠遊非避地訪道愛
童顏安能徇機巧爭奪錐刀間

與永樂諸官夜泛黃河云煙深載酒入但覺暮川虛映水見山火鳴榔聞
夜漁愛茲川上趣忽與世人疎無假然官燭中流有望舒

防與薛據在終南山豐德寺讀書韋蘇州有城中臥疾和閻薛二子屢從

邑令飲詩云車

車一良

馬日蕭蕭胡不往我廬方來從令飲臥病獨何如秋

風起江皋開戶望平蕪卽此

稀一作

音素

一作表

焉知中密疎渴者不思火

寒者不求水人生羈寓

一作旅

時去就當如此猶希心異跡

一作從茲

眷眷

存終始

防在開元天寶間有文稱岑參孟浩然章蘇州有贈章然不知得罪謫長沙之故也

商璠云防爲人好博雅其詩警策語多真素至如荒庭何所有老樹半空腹又若熊掛庭中樹龍蒸棟裏雲皎然可信也

孟浩然湘中旅泊寄防云桂水通百粵扁舟期曉發荆雲閉三巴夕望不見家裏王夢行雨才子謫長沙長沙饒瘴癘胡爲久留滯久別思款顏承懽懷接袂接袂杳無由徒增旅泊愁清猿不可聽沿月下湘流

王季友

友

古塞下曲云進軍飛狐北窮寇勢將變日落沙塵昏背河更一戰駢馬黃金勒雕弓白羽箭射殺左賢王歸奏未央殿欲言塞下事天子不召見東出咸陽門哀哀淚如霰

觀于舍人壁畫山水云野人宿在人家少朝在此山謂山曉半壁仍棲嶺
上雲開簾放出湖中鳥獨坐長松是阿誰再三招手起來遲于公大笑向
予說小弟丹青能爾爲

還山留別長安知己云出山不見家還山見家在山前是門前此去長樵
採青谿誰招隱白髮自相待唯伴澗底松依依色不改

宿東谿李十五里山亭云上山下山入溪谷溪中落日留我宿柏樹依依
當主人主人不在情亦足花石出地兩重階絕頂平天一小齋本意猶來
是山水何用相逢話舊懷

寄韋子春云出山秋雲曙山水已在春食我山中藥不憶山中人山中誰
余密白髮惟相親雀鼠晝夜無知我廚廩貧依依北舍松不厭吾南隣有
情盡棄捐土石爲同身

子美爲季友作可歎行云近者抉眼去其夫河東女兒身姓柳丈夫正色
動引經艷城客子王季友豫章太守高帝孫引爲賓客敬頗久時危可致

真豪傑二人得置君側否

商璠云季友詩放蕩愛奇務險遠出常情之外然而白首短褐良可悲夫至如觀于舍人西亭壁畫山水云野人宿在人家少朝在此山謂山曉半壁仍栖嶺上雲開簾放出湘中鳥甚有新意也

季友肅代閒詩人也錢考功起有贈季友赴洪州幕下詩云列郡皆用武南征所從誰諸侯重才略見子如瓊枝乃知季友曾遊江西之幕

郎士元酬季友半日村別業兼呈李明府云村暎寒原日已斜煙生密竹早歸鴉長溪南路當羣岫半景東隣照數家門通小徑連芳草馬飲春泉踏淺沙欲待主人林上月還思潘令縣中花

岑參潼關使阮懷王七季友云王生今才人時輩咸所仰何當見顏色終日勞夢想驅車到關下欲往阻河廣滿目徒春華思君罷心賞開門見太華朝日暎高掌忽覺蓮花峯別來更如長無心顧微祿有意在獨往不負林中期終當出塵網

楊賁

賁時興詩云貴人昔未貴咸願顧寒微及自登樞要何曾問布衣平明登紫閣日宴下彤闈擾擾路傍子無勞歌是非

賁登天寶三年第

張陵

今日漢家探使回蟻疊胡兵來未歇春風渭水不敢流總作六年心上血陵天寶間詩人也

王之渙

九月送別云薊庭蕭索故人稀何處登高且送歸今日暫同芳菊酒明朝應作斷蓬飛

出塞詩云黃沙直上白雲閒一片孤城萬仞山羌笛何須怨楊柳春光不
過玉門關

登鸛鵲樓云白日依山盡黃河入海流欲窮千里目更上一重樓

唐詩紀事

卷第二十六

五

無錫丁氏校刊

送別云楊柳東門樹青青夾御河近來扳折苦應爲別離多

之渙并州人與兄之咸之貴皆有文天寶閒人樂天作滁州刺史鄭叟墓誌云與王昌齡王之渙崔國輔總唱迭和名動一時

李陽冰

陽冰阮客舊居詩云阮客身何在仙雲洞口橫人閒不到處今日此中行

阮客縉雲之隱者也

陽冰善篆曾宰當塗太白依之

蘇渙

渙有變律詩云日月東西行照在大荒北其中有燭龍靈怪人莫測開目爲晨暉閉目爲夜色一開復一閉明晦無休息居然六合內曠哉天地德天地且不言世人強喧喧又云毒蜂成一窠高掛惡木枝行人百步外目動魂亦飛長安大道傍挾彈誰家兒右手持金丸引滿無所疑一中紛下來勢若風雨隨身如萬箭攢宛轉迷所之徒有疾惡心奈何不知機又云

養蠶爲素絲葉盡蠶不老傾筐對空林此意向誰道一女不得織萬夫受其寒一夫不得意四海行路難禍亦不在大福亦不在先世路險孟門吾徒當勉旃

杜子美有聽蘇大侍御誦詩之作

高仲武云渙本不平者善用白弩巴人號曰白跖賢人患之以比莊躄後自知非乃變節從學鄉試擢第遷御史佐湖南使崔中丞權幕崔遇害渙遂踰嶺扇動與哥舒晃跋扈交廣此猶蛟龍見血本質章矣五年作變律詩十九首上廣州連率李公其文意長於諷刺亦有陳拾遺一鱗半甲故善之或曰此子左右嬖臣侵敗王略今著其文可乎答曰漢策紀蒯通說詞皇史錄祖君彥檄書此大所以容細也夫善惡必書春秋顯訓名言渙者其殆庶幾乎豈但不棄雕蟲亦以深懲戒餘子也

渙以哥舒叛伏誅

劉長卿

字文房至監察御史以檢校祠部員外郎爲轉運使判官知淮南鄂岳轉運留後鄂兵觀察使吳仲孺誣奏貶潘州南邑尉會有爲之辯者除睦州司馬終隨州刺史以詩馳聲上元寶應閒皇甫湜云詩未有劉長卿一句已呼宋玉爲老兵矣語未有駱賓王一字已罵宋玉爲罪人矣其名重如此

李嘉祐入睦州分手路憶長卿詩云北闕忤明主南方隨白雲沿洄灘草色應接水鷗羣建德潮已盡新安江又分回看巖子瀨朗詠謝安文雨過暮山碧猿吟秋日曛吳洲不可到刷鬢爲思君

高仲武云長卿員外有吏幹而犯上兩度遷謫皆自取之詩體雖不新奇甚能鍊飾十首已上語意稍同於落句尤甚此其短也然春風吳草綠古木剡山深明日滄洲路歸人不可尋又沙鷗驚小吏明月上高枝又細雨溼衣看不見閒花滿地落無聲截長補短蓋玉徽之類歟又得罪風霜苦全生天地仁傷而不怨亦足以發揮風雅矣

過張明府別業云寥寥東郭外白首一先生考滿孤琴在家移五柳成夕陽臨水釣春雨向田耕終日空林下何人識此情

餘干旅舍云搖落暮天迴青楓霜葉稀孤城向水閉獨鳥背人飛渡口月初上鄰家漁未歸鄉心正欲絕何處擣寒衣

送鄭公歸廬山云潯陽數畝宅歸臥掩柴關谷口何人待門前秋草閒無機買藥罷不語杖藜還舊筍成寒竹空齋向暮山水流過舍下雲去到人

閒桂樹花應發因行寄一攀

自過張明府別業三篇姚合取爲極立集

負譴後題干越亭云南天愁望絕亭上柳條新落日獨歸鳥孤舟何處人生涯投嶺徼世業陷邊塵江入千峯暮花連百越春秦臺憐白首楚水怨青蘋草色迷征路鶯聲傍逐臣獨醒翻取笑直道不容身得罪風霜苦全生天地仁青山數行淚滄海一窮鱗流落誰相見空憐鷗鷺親

楊大年最喜此篇

同郭參謀題崔令公庭竹云不學媚清瀾能依上將壇蒙籠低冕過青翠卷簾看得地移根遠經霜抱節難開花成鳳實嫩筍長漁竿靄靄軍容靜

蕭蕭郡宇寬細音和角暮疎影上門寒阮巷何人在梁園幾處殘空餘軒
屏側歲晚對任安

送朱山人越中賊退後歸山云越中初戰罷江上送歸橈南渡無來信西
陵自落潮空城垂故柳舊業發春苗閭里稀相見鶯花共寂寥

送張扈司直歸越中云時危身赴難事往任浮沉萬里三江客孤城百戰
心春風吳草綠古木剡山深明日滄洲路歸雲不可尋

陪鄭中丞園林宴諸姪云心遠親魚鳥功成厭鼓鞶林中阮家醉池上謝
公題門徑蒼苔合窗陰綠篠低夕陽山向背秩草水東西舊架懸藤老疎
籬插槿齊風塵不可到誰羨武陵溪

送駱少府云汀洲芳草綠日暮更氛氲舊國無來信春江獨送君五言凌
白雪六翮向青雲空自無機事沙鷗已可羣

送李中丞之襄州云流落征南將曾驅十萬師罷歸無舊業老去戀明時
獨立三朝盛輕生一劍知茫茫江漢上日暮欲何之

送嚴士元云春風倚棹闔城水國猶寒陰復晴細雨溼衣看不見閒花
滿地落無聲日斜江上孤帆影草綠湖南萬里程東道若逢相識問青袍
今已誤儒生

章八元

八元題慈恩塔云十層突兀在虛空四十門開面面風卻怪鳥飛平地上
自驚人語半天中迴梯暗踏如穿洞絕頂初攀似出籠落日鳳城佳氣合
滿城春樹雨濛濛或云元白見其詩云不謂嚴維出此弟子
八元歸桐廬舊居寄嚴長史云昨辭夫子棹歸舟家在桐廬憶舊丘三月
暖時花競發兩溪分處水爭流近聞江老傳鄉語遙見家山減旅愁或在
醉中逢夜雪懷賢應向剡川遊

酬劉長卿月夜云夜涼河漢白卷箔出南軒過月鴻爭遠辭枝葉暗翻獨
謠聞麗曲緩步接清言宣室思前席行看拜主恩

劉云家貧唯好
月空愧子猷過

八元新安江行詩云江源南去永野度暫維梢古戍懸魚網空林露鳥巢

雪晴山脊見沙淺浪痕交自笑無媒者逢人卽解嘲

寄苗員外云舊宅平津邸槐陰接漢宮鳴騶馳道上見月直廬中白雪歌
偏麗青雲官早通悠悠一縫掖千里限清風

高仲武云八元嘗於郵亭偶題數句蓋激楚元以辭家維大異之遂親指
喻數年充賦擢第至如雪晴山脊見沙淺浪痕交得山水狀貌也

章蘇州送八元擢第往上都應制云決勝文場戰已酣行應辟命復才堪
旅食不辭遊闕下春衣未換報江南天邊宿鳥生歸思天外晴山滿夕嵐
立馬欲從何處別都門楊柳正毵毵

八元睦州人登大曆進士第

李穆

劉長卿之壻也詩寄劉云處處雪山無盡時桐廬南望轉參差舟人莫道

新安近欲上潺湲行自遲

時劉在新安郡

劉答云孤舟相訪至天涯萬轉雲山路

更賒欲掃柴門迎遠客青苔黃葉滿貧家長卿又送穆詩云渡口發梅花

山中動泉脈蕪城春草生君作揚州客鴈還空渚在人去落潮翻臨水獨揮手殘陽歸掩門狎鷗攜稚子釣魚終老身慙勲囑歸客莫話桃源人

章應物

周道遙公薨之後待價生令儀生鑿鑿生應物其詩言天寶時扈從遊幸事疑爲三衛永泰中任洛陽丞京兆府功曹大曆十四年自鄆縣令制除櫟陽令以疾辭不就建中三年由比部員外郎出刺滁州改刺江州追赴闕改左司郎中貞元初歷蘇州罷守寓蘇臺永定精舍

李肇國史補云開元後位卑而著名李北海邕王江寧昌李館陶鄭廣文

虔元魯山德蕭功曹穎張長史旭獨孤常州及崔比部元梁補闕肅章蘇

州其一也應物仕宦本末似止於蘇按白傅蘇州答劉禹錫詩云敢有文章替左司謂應物也官稱亦如此

郡齋雨中與諸文士燕集詩云兵衛森畫戟燕寢凝清香海上風雨至逍

遙池閣涼煩痾近一作消散嘉賓復滿堂自慚居處崇未覩斯民康理會

是非遣性達形迹忘鮮肥屬時禁蔬果幸見嘗俯飲一杯酒仰聆金玉章

神歡體自輕意欲凌風翔風一作雲吳中盛文史羣彥今汪洋方知大藩地一作

盛豈曰財賦強顧況和詩云好鳥集嘉樹飛雨灑高城況與數君子列坐

分兩楹文雅如何麗林塘含餘清我公未歸朝遊子不待晴白雲帝鄉遠

滄江楓葉鳴拜手欲無言零淚如酒傾寸心已摧折別離方骨驚安得凌

風翰肅肅賓天京時況左遷饒州司士參軍故寓意於詩

應物性高潔所在焚香掃地而坐惟顧況劉長卿丘丹秦系皎然之儒得

廁賓列與之酬唱樂天吳郡詩石記獨書兵衛森畫戟燕寢凝清香劉太

真與章書云顧著作來以足下郡齋燕集相示是何情致暢茂適逸如此

宋齊閒沈謝何始精於理意然緣情體物備詩人之旨後之傳者甚失其

源惟足下刺其橫流師摯之始關雎之亂於足下之文見之矣

故人重九日求橘戲贈云憐君獨坐思新橘始摘猶酸亦未黃書後欲題

三百顆洞庭須待滿林霜

樂天與元九書云近歲韋蘇州歌行才麗之外頗近興諷其五言詩又高雅閒澹自成一家之體今之秉筆者誰能及之然當蘇州在時人亦未甚愛重必待身後然後貴之

欲持一瓢酒遠寄風雨夕句萬籟自生聽大空常寂寥還從靜中起卻向

靜中銷詠山深松子落幽人應未眠句舟泊南池雨簾捲北樓風句右張

爲取作主客圖

應物寄全椒山中道士云今朝郡齋冷忽念山中客澗底束荆薪歸來煮白石欲持一瓢酒遠寄風雨夕落葉徧空山何處行跡

朱放

剡溪行寄新別云潺湲寒溪上自此成離別回首望歸人移舟逢暮雪頻行識草樹漸老傷年髮唯有白雲心爲向東山月

九日陪劉中丞宴送客云獨坐三臺妙重陽百越閒冰心觀遠俗霜氣入秋山不棄遺簪舊寧辭落帽還仍聞西上客咫尺謁天顏

九日與楊凝崔淑期登江上山有故不往云欲從攜手登高去一到門前
意已無那得更將頭上髮學他少年插茱萸

山中聽子規云幽人自愛山中宿又近葛洪丹井西窗前有箇長松樹半
夜子規來上啼

亂後經淮陰岸云荒村古岸誰家在野水溪雲處處愁惟有河邊衰柳樹
蟬聲相送到揚州

剡山夜月六言云月在沃州山上人歸剡縣溪邊漠漠黃花覆水時時白
鷺驚船

銅雀妓云恨唱歌聲咽愁翻舞袖遲西陵日欲暮是妾斷腸時
經故賀賓客鏡湖道觀云已得歸鄉里逍遙一外臣那隨水流去不待鏡
湖春雪裏登山屐林閒漉酒巾空餘道士觀誰是學仙人

送張山人云知君住處足風煙古寺荒村在眼前便欲移家逐君去唯愁
未有買山錢

送著公歸越云誰能愁此別到越會相逢長憶雲門寺門前千萬峯石牀埋積雪山路倒孤松莫學白道士無人知去蹤

放答陸澧云松葉堪爲酒春來釀幾多不辭山路遠踏雪也相過

毘陵留別云別離非一處此處最傷情白髮將青草相隨日日生

遊石澗寺云聞道幽深石澗寺不逢流水亦難知莫道山僧無伴侶獼猴常在古松枝

放字長通襄州人隱居剡溪嗣曹王皋鎮江西辟節度參謀貞元中召爲左拾遺不就

戴叔倫早行寄放云山曉旅人去天高秋氣悲明河川上沒芳草露中滋此別又萬里少年能幾時心知剡溪路聊且寄前期

顧況贈放云野客歸時無四隣黔婁別久按常貧漁樵舊路不堪入何處空山猶有人

嚴維贈放云昔年居漢水日醉習家池道勝踪常在名高身不知欲依天

目住新自始寧移生事曾無長唯將白接羅

孫逖

逖河南人年十五崔齊公日用試土火爐賦援翰立成甫冠三擅甲科吏
侍王丘試竹簾賦降階約拜待以殊禮其典誥也宰相張九齡倚撫疵瑕
沈吟久之不能易一字公除庶子苑成草詔曰西掖掌綸朝推無對張說
命二子施伯仲之禮江夏李邕自陳州入計繕錄其集詣公託知己之分
可謂人文之宗師國風之哲匠也

以上顏真卿序其文

逖終刑部侍郎

和登會稽山云稽山碧湖上勢入東溟盡煙景晝清明九峯爭隱嶙望中
厭朱紱俗內探玄牝野老聽鳴騶山童擁行軫仙花寒未落古蔓柔堪引
竹澗入山多松崖向天近雲從海天去日就江村隕能賦丘嘗聞和歌參
不敏冥搜信沖漠多士期標準願奉濯纓心長謠反招隱

奉和左司員外自洛使入京中路先赴長安逢立春日贈韋侍郎等諸公
云拜郎登省闈奉使馳車乘遙瞻使者星便是郎官應臺妙時放言皇華

德彌稱二陝聽風謠三秦望形勝此中睽友益是日多時興寒盡歲陰催
春歸日華證又云忽覩雲閒數鴈迴更逢山上正花開河邊淑氣迎芳草
林下輕風待落梅秋燾府中高唱入春卿署裏和聲來共言東閣招賢地
自有西征謝傅才楊子江樓云楊子何年邑雄雄作楚關江連二妃渚雲
近八公山驛道青楓外人煙綠嶼閒晚來潮正滿數處落帆還

李紆

字仲舒大曆初李季卿薦爲左補闕德宗時終吏侍李嘉祐有元日無衣
冠入朝詩寄再從弟補闕紆

獨孤及見元載求正字元知其所歡迎謂曰誰堪制誥及心知不我與乃
薦紆時楊炎在閣下忌及故也李嘉祐自蘇臺至望亭驛人家盡空春物
增思悵然有作寄從弟紆云南浦菰蒲覆白蘋東吳黎庶逐黃巾野棠自
發空流水江燕初歸不見人遠樹依依如送客平田渺渺獨傷春那堪回
首長洲苑烽火年年報虜塵

戴叔倫寄中書李舍人紆云萍翻蓬自卷不共本心期復入重城裏頻看
百草滋水流歸思遠花發長年悲盡日春風起無人見此時

畢燿

與獨孤常州唱和嘗贈常州云洪鑪無久停日月速如飛忽然衝人身飲
酒不須疑常州後寄燿云別時前盟在寸景莫自擲心與白日鬪十無一
滿百萬形薪火內甘作天地客與物無疎親斗酒勝竹帛

燿與杜子美友善子美贈畢四燿詩云才大今詩伯家貧苦宦卑又喜燿
除監察詩云大雅何寥闊斯人尙典型交期余潦倒才力爾精靈其推重
如此

唐詩紀事卷第二十七

于逖

姚係

趙微明

李泌

褚朝陽

蕭昕

張朝

暢當

暢諸

獨孤及

皇甫冉

皇甫曾

李幼卿

趙驊

賈豈

劉舟

長孫鑄

房白

元晟

劉太冲

姚發

鄭鄂

殷少野

鄔載

于逖

獨孤及李白皆有詩贈之蓋天寶間詩人也

憶舍弟云衰門鮮兄弟兄弟惟兩人饑寒各流浪感念傷我神夏期秋未
來安知無他因不願別天長但願見爾身茫茫天地閒萬類各有親安知
汝與我乖異同胡秦向時共形影憤懣當共陳

野外作云老病無樂事歲愁悲更長窮郊日蕭索生意已蒼黃小弟髮亦
白兩男俱不强有才且未達況我非賢良幸有朽鈍姿野外老風霜寒鴉

噪晚景喬木思故鄉魏人宅蓬池結網佇鱸魴水清魚不來歲暮空彷徨

姚係

係送周愿判官歸嶺南云早蟬望秋鳴夜琴怨離聲眇然多異感植子江山行由來重義人感激事縱橫往復念遐阻淹留慕平生晨奔九衢餞暮始萬里程山驛風月樹海門煙霞城易綃泉源近拾翠沙澈明蘭蕙一爲贈貧交空復情

京西遇舊識兼送往隴西詩云蟬鳴一何急日暮秋風樹卽此不勝悲隴陰人更去相逢與相失共是亡羊路送陸渾主簿趙宗儒之任云山中渺然意此意乃平生常日望鳴皋遙對洛陽城故人更爲隱懷此若蓬瀛夕氣冒巖上晨流瀉岸明存亡區中事影響羽人情溪寂值猿下雲歸聞鶴聲及茲春始暮花葛正明榮會有攜手日悠悠去無程

揚參軍莊送宇文邈云秋雲冒原隰野鳥滿林聲愛此田舍事稽君車馬程離堂慘不喧脈脈復盈盈蘭葉一經露香銷爲贈輕燈光耿方寂蟲思

隱餘清相望忽無際如含江海情

五老峯大明觀贈隱者云雲觀此山比與君攜手稀林端步橫水洞口入斜暉頗覺鸞鶴邇忽爲煙霧飛故人清和客默會琴心微丹術幸可授青龍當未歸悠悠平生意此日復相違

韋蘇州送係還河中詩云上國旅游罷故園生事微風塵滿路起行人何處歸留意芳樹斂惜別暮春暉幾日投關郡河山對掩扉

趙微明一作徵

思歸云爲別未幾日去日知三秋猶疑望可見日日上高樓唯見分手處白蘋滿芳洲寸心寧死別不忍生離憂

回軍跛者詩云既老又不全始得離邊城一枝假枯木步步向南行去時日一百來時月一程常恐道路傍掩棄狐兔塋所願死鄉里到日不願生聞此哀哭詞念念不忍聽惜無化人術倏忽具爾形

李泌

奉和聖製重陽賜會聊示所懷云大唐造昌運品物荷時成乘秋逢令節
賜宴懽羣情俯臨秦山川高會漢公卿欠一韻未追赤松子且泛黃菊英賡

歌聖人作海內同休明

奉和聖製中和節曲江宴百寮云風俗時有變中和節維新軒車雙闕下
宴會曲江濱金石何鏗鏘簪纓亦紛綸皇恩降自天品物咸知春

泌字長源相德宗以上已九日皆大宴集而寒食上已多同時欲以二月
名節泌請廢正月晦以二月朔爲中和節因賜大臣戚里尺謂之裁度里
閭釀宜春酒百官進農書以示務本帝乃著令與上已九日爲三令節中
外皆賜緡錢燕會

鄴侯家傳云泌賦詩譏楊國忠曰青青東門柳歲晏復憔悴國忠訴於明
皇曰賦柳爲譏卿則賦李爲譏朕可乎

褚朝陽

五絲詩云越人傳楚俗截竹更縈絲水底更休也筒中還賀之彰施文勝

質列匹美於姬錦繡侔新段羔羊寢舊詩但誇端午節誰薦屈原詞把酒
時伸奠汨羅空遠而

朝陽登天寶進士第

蕭昕

臨風舒錦云麗錦匹云終當檐展向風花開翻覆翠色亂動搖紅樓散悠
颺裏文迴照灼中低垂疑步障吹起作晴虹既與丘遲夢深知卓氏功還
鄉將制服從此表亨通

昕字中明再中博學宏詞科初爲哥舒翰掌書記翰敗僂道走蜀肅宗立
奉誥册至行在代宗守陝昕由武關從帝德宗出奉天時爲工部尙書年
八十餘至奉天後兼禮部尙書知貢舉以太子少師致仕

張朝

毛本云一作潮

小長干行云憶昔深閨裏煙霞不曾識嫁與長干人沙頭候風色三月南
風興思君下江陵八月秋風起看君發揚子去時悲如何見少別離多湘

潭幾人到妾夢常風波又云昨夜狂風度吹折江頭樹
森森暗無邊行人
在何處好乘浮雲住佳期蘭渚東鴛鴦綠浦上翡翠錦屏中
自憐十五餘

顏色桃花紅那作商人婦愁水復愁風

二詩太白集中
有之未知誰是

江風行云婿貧如珠玉婿富如埃塵貧時不忘舊富日多寵
新妾本富家
女與君爲偶匹惠好一何深中門不曾出妾有繡衣裳
歲蕤金縷光念君
貧且賤易此從遠方遠方三千里發竟悔不已日暮情更來
空望去時水
孟夏麥始秀江上多南風商賈歸欲盡君今向巴東巴東有
巫山窈窕神
女顏常恐遊此方果然不知還

朝丹陽人大曆時處士

暢當

南充謝郡客遊澧州留贈字文中丞云僕本濩洛人辱當州郡使
量力頗
及早謝歸今卽已蕭蕭若淩虛衿帶頓銷靡軍服率然來涪陽
作遊子鬱
鬱寡開顏默默獨行李忽逢平生友一笑方在此秋情寧風日
楚思浩雲

水爲語弋林者冥冥鴻遠矣

宿潭上云夜潭有仙舸與月當水中嘉賓愛明月遊子驚秋風又云青浦野陂水白露明月天夜中秋風起心事坐潛然

別盧綸云故交君獨在又欲與君離我有新秋淚非關秋風悲

平阿館赴郡云晨興平阿館見月沈江水溶溶山霧披肅肅沙鷺起奉恩
謬符竹伏軾省頑鄙何得施放山愧迎小郡吏寥落耕俗地征途清冥裏
德綏乃吾民不德將庶矣禽奸非性能多愍會衰齒共承共理事常懼墜
諸地

居山居酬韋蘇州見寄云孤茅泄煙處此中山叟居親雲寧有事耽酒詎
知餘水定鶴翻去松欹峯儼如猶煩使君問更欲結環廬

登鶴鵲樓云迴臨飛鳥上高出世塵閒天勢圍平野河流入斷山

偶宴西蜀摩訶池云珍木鬱清池和風左右披淺觴寧及醉慢舸不知移
蔭竹簟先冷照流簪影欹胡爲獨羈者雪涕向漣漪

當詩平淡多佳句如釣渚亭云花發多遠意覺雁有閒情遲暉耿不暮平
江寂無聲天住隱所云荒徑饒松子深蘿絕鳥聲陽崖全帶日寬嶂偶通
耕山居云水定鶴翻去松欹峯儼如又寒林苞晚菊風絮露垂楊湖畔聞
魚唱天邊數雁行皆有遠意

韋蘇州寄當詩云寇賊起山東英俊方未閒聞君新應募籍籍動京關出
身文翰場高步不可攀青袍未及解白羽插腰閒昔爲瓊樹枝今有風霜
顏秋郊細柳道走馬一夕還丈夫當爲國破敵如摧山何必事州府坐使

鬢毛斑

聞以子弟
被召從軍

李端贈當詩并序云余少尙神仙且未能去友人暢當以禪門見導余心
知其是而未得其門因寄詩以答焉少喜神仙術年來久蹉跎壯志一爲
累浮生事漸多衰顏不相識歲暮定相過請問宗居士君其奈老何
當河東人貞元初爲太常博士後以果州刺史卒與弟諸皆有詩名

暢諸

早春詩云獻歲春猶淺園林未盡開雪和新雨落風帶舊寒來聽鳥聞歸雁看花識早梅生涯知幾日更被一年催

獨孤及

字至之洛陽人時號獨孤常州夏中酬于逖畢燿問病見贈云救物智所昧學仙願未從行藏兩乖角蹭蹬風波中薄宦恥降志臥疴非養蒙閉關涉兩旬羈思浩無窮鸞鷲何處來雙舞下碧空離別隔雲雨惠然此相逢把手賀疾閒舉杯忻酒濃新詩見久要清論激深衷高館舒夏簟開門延微風火雲赫嵯峨日暮千萬峯遙指故山笑相看撫號鐘聲和由心清事感出氣同出處未易料且歌緩愁容願君崇明德歲暮如青松

賈員外處見中書賈舍人巴陵詩集覽之懷舊代書寄贈云海岸望青瑣雲長天漫漫十年不一展知有關山難適逢阮始平立馬問平安取公詠懷詩示我江海瀾整若歸武庫森然矛戟寒眼明遺頭風心悅忘朝餐大駕今反正熊羆扈鳴鑾公遊鳳凰沼獻可在筆端繫越有長纓封關祇一

丸矯然翔寥廓仰望在羽翰嘉會不我與相思歲云殫惟當袖佳句持此
青琅玕

題恩潭寺上方詩云谿口聞法鐘倚橈登翠屏攀雲到金界合掌開禪局
鬱律衆山抱空濛花雨零老僧指香樓云是不死亭眇眇於越路茫茫春
草青遠山噴百谷繚繞馳東溟目極相何在境照心亦冥書然諸根空破
結如破瓶下視三界狹但聞五濁腥山中有良藥吾欲墮天刑

觀海詩云北登渤海島迴首秦東門誰施造物功鑿此天地源瀕洞吞百
谷周流無四垠廓然混茫際望見天地根白日自中吐扶桑如何捫迢迢
蓬萊峯想像金臺存秦帝曾經此登臨翼飛翻揚旌百神會望日羣仙奔
徐福竟何成羨門徒空言唯見石橋足千里潮水痕

及與薛華于遯畢燿友善安定梁肅敘其文曰天寶中作者數人頗節之
以禮洎公爲之於是操道德爲根本總經籍爲冠帶以易之精義詩之雅
興春秋之褒貶屬之爲辭故其文寬而簡直而婉辨而不華博厚而高明

論人無虛美比事爲實錄天下凜然復觀兩漢之遺風善乎崔公祐甫之言曰常州之文以立憲誠世褒賢遏惡爲用故議論最長其或別於碑頌流於詠歌峻如嵩華盛如江河若贊堯舜禹湯之命爲典爲誥爲謨爲訓人皆許之而不吾試失論道之位宜而不陟惜哉

皇甫冉

字茂政玄晏先生之後張曲江深愛之謂清穎秀拔有江徐之風大曆二年遷右補闕

冉題巫山云巫峽見巴東迢迢出半空雲藏神女館雨到楚王宮朝暮泉聲落寒暄樹色同清猿不可聽偏在九秋中

冉少室昇仙歌云紅霞紫氣甚氤氳絳節青童迎少君忽從林下昇仙去空使時人禮白雲

送韓司直云游吳還適越來往任風波復送王孫去其如春草何岸明殘雪在潮滿夕陽多季子留遺廟停舟試一過

毛本云又見皇甫曾集
郎士元集劉長卿集

宿嚴維宅昔聞玄度宅門向會稽峯君住東湖下清風繼舊踪初秋臨水
月半夜隔山鐘世路多離別良宵詎可逢

途中送權曄云淮海風波起江關憂思長同悲鵲遶樹獨作雁隨陽山晚
雲和雪汀寒月照霜由來濯纓處漁父愛滄浪

西陵寄一公云西陵遇風處自古是通津終日空江上雲山若待人汀洲

寒事早魚鳥興情新南望山陰路吾心有所親

姚合取四詩爲極玄集
毛本云又見皇甫曾集

冉題裴周新園云東郭訪先生西郊尋隱路久爲江南客自有雲陽樹已
得閒園心不知公府步開門白日遠倚杖青山暮果熟任霜封籬疎從水
度窮年無牽綴往事惜淪誤惟見耦耕人朝朝自來去

送元盛還潛山云深山秋事早君去復何如裊露收新稼迎寒葺舊廬題
詩卽招隱作賦是閒居別後應相憶嵇康懶寄書

秋日東林之作云閒看秋水心無事坐對寒松手自栽廬阜高僧留偈別
茅山道士寄書來燕知社日辭巢去菊爲重陽冒雨開淺薄將何稱獻納

臨歧終日自遲迴，獨孤筵送韋使君。赴昇州云中司龍節，貴上客虎符新。
地控吳襟帶才高，漢摺紳泛舟應度臘。入境便行春，何處歌來暮。長沙建
業人。

送李錄事赴饒州云：北人南去雪紛紛，雁叫汀洲不可聞。積水長天隨遠
色，荒林極浦足寒雲。山從建業千峯起，江自潯陽九派分。借問督郵纔弱
冠，府中年少不如君。

高仲武云：皇甫冉補闕，自擢桂禮闈，遂爲高格。往以世道艱虞，避地江外。
每文章一到，朝廷作者變色。於詞場爲先輩推薦，卽爲伯仲。誰家勝負，或
逐鹿中原。如果熟任霜封籬，疎從水度。又裊露收新稼，迎寒葺舊廬。又燕
知社日，辭巢去菊爲重陽。冒雨開可以雄視，潘張平揖沈謝。又巫山詩終
篇皆麗，自宋齊梁陳周隋以來，採掇者無數。而補闕獨獲驪珠，使前賢失
步。後輩卻立，自非天假，何以迨斯。恨長轡未騁，而芳蘭早凋。悲夫。

毛本云
與中興

閒氣集
小異

獨孤至之敘其文云五言詩之源生於國風廣於離騷著於李蘇盛於曹
劉其所自遠矣當漢魏之間雖以朴散爲器作者猶質有餘而文不足以
今揆昔則有朱紘疏越太羹遺味之歎歷千餘歲至沈詹事宋考功始財
成六律彰施五色使言之而中倫歌之而成聲緣情綺靡之功至是乃備
雖去雅浸遠其麗有過於古者亦猶路鼗出於土鼓篆籀生於鳥跡也沈
宋旣沒而崔司勳顥王右丞維復崛起於開元天寶之間得其門而入者
當代不過數人補闕其一也

皇甫曾

寄中書王舍人詩云腰金載筆謁承明志道安禪得此生西掖幾年綸綍
貴東山遙夜薜蘿情風傳客漏星河曙月上梧桐雨露清聖主好文誰爲
薦閉門空賦子虛成

送孔徵士云谷口山多處君歸不可尋家貧清吏在身老白雲深掃雪開
松徑疏泉過竹林餘生負丘壑相送亦何心

烏程水樓留別云悠悠千里去惜此一樽同客散高樓上帆飛細雨中山
程隨遠水楚思在青楓共說前期易滄波處處通

張汾見訪郊居云林中雨散早涼生已有迎秋促織聲三徑荒蕪羞對客
十年衰老愧稱兄愁心自惜江離晚世事方看木槿榮君若罷官攜手日
尋山莫算白雲程雲林邕上人云春山臨一室獨坐草萋萋身寂心成道
花閒鳥自啼細泉松徑裏返景竹林西晚與門人別依依出虎溪

送林中丞還京云罷戰回龍節朝天上鳳池寒生五湖道春及萬年枝邵
化多遺愛胡清已畏知懷恩偏感別墮淚向旌麾

贈霈師云南嶽滿湘沅吾師經利涉身歸沃洲老名與天公接靜教傳荆
吳道緣止漁獵觀空色不染對鏡心自愜室中人寂寞門外山重疊天台
積幽夢早晚當負笈

尋陸處士云幾年人不見林下掩柴關留客當清夜逢君話舊山隔城寒
杵急帶月早鴻還南陌雖相近其如隱者閒

哭陸處士云從此無期見柴扉對雪開二毛逢世難萬恨掩泉臺返照空
堂夕孤城弔客回漢家偏訪道猶未鶴書來

送李中丞云上將還專席雙旌復出秦關河三晉路賓從五原人孤戍雲

連海平沙雪度春酬恩看玉劍何處有煙塵

尋陸處士詩以下三篇姚合取爲極玄集

高仲武云昔孟陽之與景陽罔慚厥弟協居上品載處下流今侍御之與
補闕文辭亦爾體制清潔華不勝文然寒生五湖道春及萬年枝五言之
選也其爲士林所尙宜哉

曾字孝常爲殿中侍御史天寶中兄弟踵登進士第名相上下時比張氏
景陽孟陽云

曾與劉長卿友善曾過長卿碧澗別業詩云謝客開山後郊扉去水通江
湖十年別衰老一樽同返照寒川滿平田暮雪空滄洲自有趣不復泣途
窮長卿和云荒村帶晚照落葉亂紛紛古路無行客寒林獨見君野橋經
雨斷澗水向田分不爲憐同病何人到白雲曾又寄長卿云南憶新安郡

千江帶夕陽斷猿知夜久秋草助江長鬢髮應成素青松獨見霜愛才稱
漢主題柱待田郎長卿和云離別江南北汀洲葉再黃路遙雲共水砧迴
月如霜歲儉依仁政年衰憶故鄉佇君宣室召漢法已張綱

盧綸哭曾云攀龍與泣麟哀樂不同陳九陌霄漢侶一燈冥冥人舟沈驚
海闊蘭折怨霜頻已矣復何見故山應更春

時同李包二侍郎哭曾故云

李幼卿

近日霜毛幾番新別來芳草兩迴春不堪花落花開處況是江南江北人
薄宦龍鍾心懶慢故山寥落水齋淪緣君愛我疵瑕少願竊仁風寄老身
幼卿字長夫隴西人大曆中以右庶子領滁州別業在常州義興曰玉潭
莊在滁州時以書托獨孤至之獨孤以詩寄云日日思瓊樹書書話玉潭
知同百口累曷日辦抽簪又至之題玉潭云碧玉徒強名冰壺難比德唯
當寂照心可並齋淪色幼卿所謂故山寥落水齋淪者也

蕭穎士樂聞人善以推引後進爲己任如李陽水李幼卿皇甫冉陸謂輩

由獎目皆爲名士滁州迨今有庶子泉以幼卿得名也

趙驂

送晁補闕歸日本國云西掖承休澣東隅反故林來稱郟子學歸是越人
吟馬上秋郊遠舟中曙海陰知君懷魏闕萬里獨搖心

驂字雲卿擢開元進士第嘗諂祿山貶晉江尉建中爲秘書少監與顏真
卿蕭穎士等善其子宗儒

賈邕

蕭夫子赴東府門人送者十二人劉太真爲之序云先師微言既絕者千
有餘載至夫子而後洵美無度得夫天和頃東倭之人踰海來賓舉其國
俗願師於夫子非敢私請表聞於天子夫子辭以疾而不之從也退然貧
居述作萬卷去其浮辭存夫正言昔左氏失於煩穀梁失於短公羊失於
俗而夫子爲其折衷王公交辟拒而不應從官三年始參謀於洛京家兄
與先鳴者六七人奉壺開筵執弟子之禮於路左太真以文求進以無聞

見舉而不恡爲夫子羞春雲輕陰草色新碧皎皎匹馬出於青門吾徒喟然瞻望不及賦詩仰餞者自相里造賈邕以下凡十二人皆及門之選也邕得路字云子欲適東周門人盈歧路高標信難仰薄官非始務綿邈千里途徘徊四郊暮征車日云遠撫已慚深顧
邕天寶九年李暉侍郎下登第

劉舟

冉一作

得適字云大名掩諸古獨斷無不適德遂天下宗官爲幕中客驢山浮雲散灞岸零雨夕請業非遠期圓光再生魄

天寶十六年楊浚舍人下登第

長孫鑄

得離字云大德詎可擬高梧有長離素懷經綸具昭世猶安卑落日去關外悠悠隔山陂我心如浮雲千里相追隨
天寶十二年楊浚舍人下登第

房白

得還字云夫子高世蹟時人不可攀今予亦云幸謬得承溫顏良策資入
幕遂行從近關青春灞亭別此去何時還
天寶十三年楊浚舍人下登第

元晟

得引字云吾見夫子德誰云習相近數仞不可窺言味終難盡處喧慮常
澹作吏心亦隱更有嵩少峯東南爲勝引
晟河南府進士

劉太沖

得淺字云吾師繼微言贊述在墳典寸祿聊自資平生宦情鮮透遲東州
路春草深復淺日遠夫子門中心曷由展
天寶十二年楊浚舍人下登第

姚發

得草字云天生良史筆浪跡擅文藻中夏授參謀東夷願聞道行觴翫春日
日餞席藉芳草幸得師季良欣留篋笥寶
天寶十二年楊浚舍人下登第

鄭愕

得往字云斤溪數畝田素心擬長往繫君曲得引使我纓俗網風塵豈不
勞道義成心賞春郊桃李月忍此戒征兩
天寶十二年楊浚舍人下登第

殷少野

得散字云官閒幕府下聊以任縱誕文學魯仲尼高標嵇中散出門時雨
潤對酒春風暖感激知己恩別離魂欲斷

天寶十二年楊浚舍人下登第

鄔載

不預此會

得君字云策名十二載獨立先期文邇來及門者半已昇青雲青雲豈無

姿黃鵠素不羣一辭芸香吏幾歲滄江潰散職既不羈天聽亦昭聞雖承
急賢詔未謁陶唐君薄俸還自急此言那足云和風媚東郊時物滋南薰
蕙草正可摘豫章猶未分宗師忽千里使我心氛氲

天寶十二年楊浚侍郎下登第

穎士留別二三子得韻字云二紀尙雌伏徒然參先進英英爾衆賢名實
鬱雙振殘春惜將別清洛行不近相與愛後時無令孤逸韻

鄔載有文名與錢起友善起同載旅寓關中起有詩云文士皆求遇今人
誰至公靈臺一寄宿楊柳再春風更惜忘形友頻年失志同羽毛齊燕雀
心事阻鴛鴻留滯慚歸養飛鳴恨觸籠橘懷香夢裏書去客愁中殘雪送
歸雁韶光棄斷蓬吞悲問唐舉何路出屯蒙

又送鄔三落第還鄉云郢客文章絕世稀常嗟時命與心違十年失路誰
知己千里思親獨遠歸雲帆春水將何適日愛東南暮山碧關中新月對
離罇江上殘花待歸客名官無媒自古遲窮途此別不堪悲荷衣垂釣且

安命金馬招賢會有時

劉長卿過鄔三湖上書齋云何事東林客忘機一釣竿酒香開甕好湖色
對門寒向郭青山送臨池白鳥看見君能浪跡予亦厭微官

...

...

...

...

...

...

...

...

...

...

...

...

...

...

...

...

...

唐詩紀事卷第二十七

唐詩紀事卷第二十八

張濯

孫叔向

朱長文

胡令能

鄭丹

李希仲

杜誦

鄭錫

古之奇

秦系

令狐峘

楊凌

劉太真

顧況

薛業

劉希戩

朱絳

元凜

楊志堅

劉方平

李揆

戎昱

張濯

題舜廟云
古都遺廟出山濱
萬代千秋仰聖君
蒲坂城邊長逝水
蒼梧野外不歸雲
寥寥象設魂應老
寂寂虞篇德已聞
向晚風吹庭下柏
猶疑琴曲韻南薰

濯登上元進士第

孫叔向

題昭應溫泉云
一道溫泉遶御樓
先皇曾向此中遊
雖然水是無情物也

到宮前咽不流

送咸安公主云鹵簿遲遲出國門漢家公主嫁烏孫玉顏便向穹廬去衛霍空承明主恩咸安德宗女元和時追封燕國襄穆公主

朱長文

吳興送梁補闕歸朝賦得荻花云柳家汀洲孟冬月雲寒水清荻花發一枝持贈朝天人願比蓬萊殿前雪
春眺揚州西岡寄于員外云蕪城西眺極蒼流漠漠昏煙間曙樓瓜步早潮吞建業蒜山晴雪照揚州

望中有懷云龍向洞中銜雨出鳥從花裏帶香飛白雲斷處見明月黃葉落時聞擣衣

宿新安江深渡館寄鄭州王使君云霜飛十月中搖落衆山空孤館閉寒木大江生夜風賦詩忙有意沈約在關東

送李司直歸浙東幕兼寄鮑將軍云翩翩書記早曾聞二十年來願見君

今日朝廷思白髮同時幾許在青雲人從北固山邊去水到西陵渡口分
會作王門曳裾客爲余前謝鮑將軍

尉節度大夫初封東平郡王

長文大曆間江南詩人

胡令能

詠繡障云日暮堂前花蕊嬌爭拈小筆上牀描繡成安向春園裏引得黃鶯下柳條

小兒垂釣云蓬頭稚子學垂綸側坐莓苔草映身路人借問遙招手恐畏魚驚不應人

喜莆田韓少府見訪云忽聞梅福來相訪笑著荷衣出草堂兒童不慣見車馬爭入蘆花深處藏

令能莆田隱者少爲負局鏤釘之業以所居列子之里家貧遇茶果必祭列子以求聰明或夢人割其腹以一卷書內之遂能吟詠禪學尤邃世謂胡釘鉸者也貞元元和間人

鄭丹

元味間人

肅宗挽歌云國以重明受天從諒闇移諸侯方北面白日又西馳龍影當泉落鴻名向廟垂永言青史上還見載無爲

玄宗挽歌云律曆千年會車書萬里同固期常載物豈意厭觀風地慘新疆理城摧舊戰功山河萬古在今夕盡歸空

高仲武云鄭丹詩翦刻婉密寶應中獻二帝兩后挽歌三十首詞旨哀楚得臣子之致雖不及事朝廷嘉之解褐蘄州錄事參軍二章其尤者也

丹大曆間詩人

李希仲

東皇太一詞云吉日初齋戒靈巫穆上皇焚香布瑤席鳴珮奠椒漿緩舞花飛滿清歌水去長迴波送神曲雲雨滿瀟湘

蘄北行云旄頭有精芒胡騎獵秋草羽檄南渡河邊庭用兵早漢家愛征戰宿將今已老辛苦羽林兒從戎榆關道一身救邊速烽火通蘄門前軍

飛鳥斷格鬪塵沙昏寒日鼓聲急單于夜將奔當須徇忠義身死報國恩
高仲武云希仲華勝於質此所謂才力不足務爲清淺者也然前軍飛鳥
斷格鬪塵沙昏亦出塞實錄疊疊不歇可及于中矣

希仲趙郡人天寶初宰偃師范陽兆戎挈家避亂入江淮

杜誦

誦哭長孫侍御玄云道爲謀猷重名因賦頌雄禮闈曾擢桂憲府既乘驄
流水生涯盡浮雲世事空惟應舊松柏蕭瑟九原中亦載杜陵集中
高仲武云誦詩平調不失文流如流水生涯盡浮雲世事空得生人始終
之理故編於集

誦大曆間詩人也

鄭錫

邯鄲少年行云霞鞍金口驪豹袖紫貂裘家住叢臺下門前漳水流喚人
呈楚舞借客試吳鉤見說秦兵至甘心赴國讐

李嘉祐與錫遊春詩云東門垂柳長回首獨心傷日暖臨芳草天晴憶故鄉
暎花鶯上下過水蝶悠颺借問同行客今朝淚幾行李端司空曙皆錫友也

錫登寶應進士第寶曆間為禮部員外郎 事見李翱所撰李長史墓銘

古之奇

秦人謠云微生祖龍代卻思堯舜道何人仕帝庭拔殺指佞草姦臣弄民柄
天子恣衷抱上下一相蒙馬鹿遂顛倒中國既版蕩骨肉安可保人生貴年壽
吾恨死不早

李端送之奇赴京州幕云疇昔十年兄相逢五校營今宵舉杯酒隴月見

軍城 時從馬僕射辟

之奇登寶應進士第

秦系

系呈韋蘇州詩云久臥雲間已息機青袍忽著狎鷗飛詩興到來無一事

郡人今有謝元暉

系字公緒會稽人隱泉州南安九日山張建封聞系不可致就加校書郎自號東海釣客與劉長卿善權德輿曰長卿自以爲五言長城系用偏師攻之矣韋答系云知掩山扉三十秋魚鬚翠碧棄牀頭莫道謝公方在郡五言今日爲君休蓋系以五言得名久矣年八十餘卒南安人號其峯爲高土峯

系將移耶溪舊居留呈嚴長史維陳校書允初云鷄犬漁舟裏長謠任興行卽令邀客醉已被遠山迎書笈將非重荷衣著甚輕謝安無箇事急起爲蒼生

山中贈張評事時授右衛佐云終年常避喧自注五千言流水閒過院春風與閉門山茶邀上客桂實落前軒何事教予起微官不足論

系家剡山向隱一紀大曆五年人或以其文聞於留守薛公無何奏系右衛率府倉參軍意所不欲以疾辭免因將命者獻詩云由來那敢議輕肥

散髮行歌自採薇通客未能忘野興辟書令遣脫荷衣家中匹婦空相笑
池上群鷗盡欲飛更乞大賢容小隱益看愚谷有光輝系曾與鮑員外同
舉場因其見尋呈情云少小爲儒不自強如今嬾復見侯王覽鏡自知身
漸老買山將作計偏長荒涼鳥獸同三徑撩亂琴書共一牀猶有郎官來
問病時人莫道我佯狂

山中寄錢起苗發云空山歲計是胡麻江海無梁泛一槎幼子唯能覓梨
栗逸妻相共老煙霞高吟麗句驚巢鶴開閉春風看落花借問郡中何水
部今人幾箇屬詩家

令狐峒

儒服學從政遂爲塵事嬰銜命東復西孰堪異鄉情懷祿且懷恩策名敢
逃名羨彼農畝人白首親友并江山入秋氣草木彫晚榮方塘寒露凝旅
館寒飆生懿交守東吳夢想聞頌聲雲水方浩浩離憂何時平右令狐峒
寄韋蘇州詩峒德棻五世孫天寶末進士宰相楊炎故出杜鴻漸門下其

子封求弘文生以託峒峒曰必得公手書得書即奏之炎具奏所以然德宗曰姦人也自禮侍貶衡州別駕

峒介懷人與爲怨

章蘇州答峒詩云一凶乃一

吉一是復一非孰能逃斯理亮在識其微三黜故無愠高賢當庶幾但以親交戀音容邈難希况惜別離人但忻藩守歸期宴方陪廁山川又乖違吳門冒海霧峽路凌連磯同會在京國相望涕沾衣明時重英才當復列彤闈白玉雖塵垢拂拭還光輝

峒再謫三衢遇田敦爲牧乃門生也相見敦曰吾今日方見座主乃分半俸奉之

楊凌

淮陽爲郡暇坐惜流芳歇散懷累榭風清暑澄潭月陪燕辭三楚戒途綿百越非當遠別離雅奏何由發右楊凌詩韋應物刺滁州凌時以協律客滁州既別韋寄詩云吏散山閣掩鳥鳴山郡中遠念長江別俯覺坐隅空舟泊南池雨簟捲北樓風併罷芳罇燕爲愴昨時同故凌以前詩謝之

凌明妃怨云漢國明妃去不還馬馳絃管向陰山匣中縱有菱花鏡羞對
單于照舊顏
凌字恭履最善文章大曆中與兄憑凝踵進士第時號三楊凌終侍御史
子敬之

劉太真

寵至乃不驚罪及非無由奔迸歷畏途緬邈赴偏陬牧此彫弊忙屬當賦
斂秋夙興諒無補旬暇焉敢休前日懷友生獨登城上樓迢迢西北望遠
思不可收今日車騎來曠然銷人憂晨迎東齋飯晚渡南溪遊以我碧流
水泊君青翰舟莫將遷客程不爲勝景留飛札謝三守斯篇希見酬右劉
太真詩太真刺信州時顧十二左遷過上饒出韋蘇州房杭州韋睦州三
使君詩太真繼焉太真宣州人師蕭穎士蕭云太真吾入室者也貞元四
年德宗詔郡臣宴曲江自爲詩群臣皆和帝自第之以太真李紆等爲上
鮑防于邵等次之張濛等爲下與擇者四十二人韋蘇州答太真詩云瓊

樹凌霜雪葱蒨如芳春英賢雖出守本自玉階人宿昔陪郎署出入仰清塵孰云俱列郡比德豈爲隣其見重如此

顧況

況字逋翁姑蘇人至德進士性詼諧與柳渾李泌爲方外友德宗時渾輔政以祕書郎召及泌相自謂當得達官久之遷著作郎況坐詩語調謔貶饒州司戶居於茅山以壽終皇甫湜爲況文集序云偏於逸歌長句駿發踔厲往往若穿天心出月脅意外驚人語非尋常所能及最爲快也其爲人類其詞章云

況志尙疎逸近於方外時宰招以好官況以詩答云四海如今已太平相公何用喚狂生此生還似籠中鶴東望瀛洲叫一聲

上柳相公

子規詩云棲霞山中子規鳥口邊血出啼不了山僧夜後初入定聞似不聞山月曉

露青竹杖歌云鮮于仲通正當年章仇兼瓊在蜀川約束蜀兒探馬鞭蜀

兒探鞭不敢眠橫截斜度飛鳥邊繩橋夜上層崖巔頭插白雲跨飛泉探
得馬鞭長且堅浮漚丁子珠聯聯灰煮蠟揩光爛然章仇兼瓊持天上
天雨露何其偏飛龍閑廐馬數千朝飲吳江夕秣燕紅塵撲轡汗濕韉師
子麒麟聊比肩曲江昆明洗刷牽四蹄蹋浪頭栴天蛟龍稽顙河伯虔拓
羯胡雛腳手鮮陳閔韓幹丹青妍欲貌未貌眼欲穿金鞍玉勒錦連乾騎
入桃花楊柳煙十二樓中奏管絃樓中美人奪神仙爭愛大家把此鞭祿
山入關關破年忽見揚州北邸前祇有人還一千錢亭亭筆直無皴節磨
將形相一條鐵市頭終是無人別江海賤臣不拘綈垂綃掛影西窗缺稚
子覓衣挑仰穴家僮拾薪幾拗折玉潤猶霑玉壘雪碧蘚似染萇弘血蜀
帝祠邊子規咽相如橋上文君絕往年策馬降至尊七盤九折橫劍門穆
王八駿起崑崙安用冉冉孤生根聖人不貴難得貨金玉珊瑚誰買恩
況嘗攻小筆求知心亭監人詰之曰余要貌海中山耳仍辟畫省王默爲
副任職半年落筆有奇趣

山中作云野人愛向山中宿況在葛洪丹井西庭前有箇長松樹半夜子規來上啼況又有汀洲渺渺江籬短疑是疑非兩斷腸句巫峽朝雲暮不歸洞庭秋水晴空滿句顏垣化爲陂陸地堪乘舟句大姑山盡小姑出月照洞庭行客船句右張爲取作主客圖

代佳人贈別云萬里行人欲渡溪千行珠淚滴爲泥已成殘夢隨君去猶有驚鳥半夜啼

秋題葉道士山房云水邊垂柳赤欄橋洞裏仙人碧玉簫近得麻姑書信否潯陽向上不通潮

金璫玉珮歌云贈君金璫太霄之玉珮金鎖禹步之流珠五嶽真君之祕籙九天丈人之寶書東井沐浴辰巳畢先進洞房上奔日借問君從何處來黃姑織女機邊出

悲歌三首并序云情思發動聖賢所不免也故師乙陳其宜延陵審其音理亂之所經王化之所興信無逃聲豈徒文彩之麗遂作歌以悲之云邊

城路今人犁田昔人墓崖上沙昔時江水今人家今人昔人共長歎四氣
相摧節迴換明月皎皎入華池白雲離離渡霄漢

短歌行云我欲昇天天隔霄我欲渡水水無橋我欲上山山路險我欲汲
井井泉遙越人翠被今何夕獨立沙邊江草碧紫燕西飛欲寄書白雲何
處蓬萊客

遠思曲云新繫青絲百尺繩心在君家轆轤上我心皎潔君不知轆轤一
轉一惆悵何處春風吹曉幕江南淥水通朱閣美人二八顏如花泣向春
風畏花落臨春風聽春鳥別時多見時少愁人一夜不得眠瑤井玉繩相
對曉

攀龍引云軒轅黃帝初得仙鼎湖一去二千年周流三十六洞天洞中日
月星辰聯騎龍倒景遊八極軒轅弓劍無人識東海青童寄消息

八月五日歌云四月八日明星出摩耶夫人降前佛八月五日佳氣新昭
成太后生聖人開元九年燕公說奉詔聽置千秋節丹青廟裏貯姚宋花

萼樓中宴岐薛清樂靈香幾處聞鸞歌鳳吹動祥雲已於武庫見靈鳥仍
向晉山逢老君率土溥天無不樂河清海晏窮寥廓梨園弟子傳法曲張
果先生進仙藥玉座淒涼遊帝京悲翁回首望承明雲韶九奏杳然遠唯
有五陵松柏聲

洞庭秋日云青草湖邊日影低黃茅嶂裏鷓鴣啼丈夫飄蕩今如此一曲
狂歌楚水西

薛業

洪州客舍寄柳博士芳詩云去年燕巢主人屋今年花發路傍枝年年爲
客不到舍舊國存亡那得知胡塵一起天下亂何處春風無別離
贈張折衝詩云都尉今無事時清但閉關夜霜戎馬瘦秋草射鵬閒位以
穿楊得名因折桂還馮唐真不遇嘆息鬢毛斑

獨孤常州送薛處士業遊廬山序云薛侯敦於詩困於學敏於行時然後
言言而寡尤口弗言祿祿亦不及識其真者以爲永嘆而薛侯居之澹如

君子哉若人也拂纓上之塵西遊廬山趙補闕驊王侍御定張評事有略
各以文爲贈余亦持片言用代疎麻瑤華之贈

劉希戩

彈琴詩云碧山本岑寂素琴何清幽彈爲風入松崖谷颯以秋庭鶴舞白
雪泉魚躍洪流余欲娛世人明月難暗投感嘆未終曲淚下不可收嗚呼
鍾子期零落歸山丘死而若有知魂兮從我遊

朱絳

春女怨云獨坐紗窗刺繡遲紫荊枝上嚙黃鸝欲知無限傷春意併在停
針不語時顧陶取此詩爲類選

元凜

元日對酒云嘉辰復遇登高臺良朋笑語傾金罍煙攤秋色正堪翫風惹
菊香無限來未保亂離今日後且謀懽洽玉山頽誰知靖節當時事空學
狂歌倒載迴

中秋夜不見月云蟾輪何事色全微賺得佳人出綉幃四野霧凝空寂寞
九霄雲鎖絕光輝吟詩得句翻停筆翫處臨樽卻掩扉公子倚欄猶悵望
懶將紅燭草堂歸

楊志堅

顏魯公爲臨川內史邑有楊志堅者嗜學而貧妻厭之一日告離志堅以
詩送之曰平生志業在琴詩頭上如今有二絲漁父尙知溪谷暗山妻不
信出身遲荆釵任意撩新鬢明鏡從他別畫眉今日便同行路客相逢卽
是下山時持詩詣州請公牒求別醮顏公案其妻曰王尊之廩旣虛豈歡
黃卷朱叟之妻必去寧見錦衣污辱鄉閭敗傷風俗若無褒貶僥倖者多
遂箠之後無棄其夫者

劉方平

秋夜泛舟云林塘夜汎舟蟲響荻颼颼萬影皆因月千聲各爲秋歲華空
復晚鄉思不堪愁西北浮雲外伊川何處流

皇甫冉寄方平詩云十年不出溪林中一朝結束甘從戎嚴子持竿心寂
歷寥落荒籬遮舊宅又曰與君從來同語默豈是悠悠但相識天畔三秋
空復情袖中一字無由得

方平春怨云紗窗日落漸黃昏金屋無人見淚痕寂寞空庭春又晚梨花
滿地不開門

方平泛舟思鄉云西北浮雲外伊川何處流蓋洛中人也皇甫冉之京留
別方平詩云遲遲越二陵迴首但蒼茫喬木清宿雨故關愁夕陽冉嘗爲
河南從事自是遷左拾遺留別於河南也

方平與元魯山善不仕蓋邢襄公政會之後也蕭穎士云山東茂異有河
南劉方平

李揆

揆與饒州刺史封漸仲容叔霽連句揆筆力適媚有兔相踐蓬閣臥疴淮
海濱偶逢潘川守宛是潘陽親又云共仰新侯伯同瞻舊宰臣又云鄉路

轅思北家林巷喜南

出江鄰
幾雜志

前定錄云有巫者告揆曰公當爲拾遺遺以一書緘之云得此官卽開後
明皇召試紫絲盛露囊賦果得拾遺啓緘卽此賦也

戎昱

憲宗朝北狄頻寇邊大臣奏議古者和親有五利而無千金之費帝曰比
聞有士子能爲詩而姓名稍僻是誰宰相對以包子虛冷朝陽皆非也帝
遂吟曰山上青松陌上塵雲泥豈合得相親世路盡嫌良馬瘦唯君不棄
臥龍貧千金未必能移性一諾從來許殺身莫道書生無感激寸心還是
報恩人侍臣對曰此是戎昱詩也京兆尹李巒擬以女嫁昱令其改姓昱
固辭焉帝悅曰朕又記得詠史一篇云漢家青史內計拙是和親社稷因
明主安危託婦人豈能將玉貌便欲靜胡塵地下千年骨誰爲輔佐臣帝
笑曰魏絳之功何其懦也大臣遂息和戎之論矣

塞上曲云樓上畫角哀卽知兵心苦試問左右人無言淚如雨何意休明

時終年事鞏鼓

畫食京明賦吳小善篇問古八無言或賦雨詩意於閱

長安秋夕云八月更漏長愁人起常早閉門寂無事滿地生秋草昨宵西

窗夢先入荆門道遠客歸去來在家貧亦好

昱在零陵于襄陽聞有妓善歌取之昱以詩遣行曰寶鈿香娥翡翠裙妝

成掩泣欲行雲慙慙好取襄王意莫向陽臺夢使君于遂遣還昱登進士

第衛伯玉鎮荆南辟爲從事後爲辰虔二州刺史

晉書伯玉字道武

昱贈別張駙馬云上元年中長安陌見君朝下欲歸宅飛龍駙馬三十疋

玉勒雕鞍照初日數里衣香遙撲人長衢雨歇無纖塵從奴斜抱敕賜錦

雙雙蹙出金麒麟天子愛堦皇后弟獨步明時負權勢一身扈蹕承殊澤

甲第朱門聳高戟鳳凰樓上伴吹簫鸚鵡盃中醉留客泰去否來何足論

宮中晏駕人事翻一朝負譴辭丹闕五年待罪湘江源冠冕淒涼幾遷改

眼看桑田變成海華堂金屋別賜人細眼黃頭總何在清宮相見寸心悲

懶欲今時問昔時看君風骨殊未歇不用愁來雙淚垂

肅宗張皇后弟清潛尚大寧延和二

郡公主代宗立廢后
爲庶人清潛皆流放

寶應中過滑州洛陽後同王季友作苦哉行詩云妾家清河邊七葉承貂
蟬身爲最小女偏得渾家憐親戚不相識幽閨十五年有時最遠出祇到
中門前前年狂胡來懼死翻生全今秋官軍至豈意遭戈鋌匈奴爲先鋒
長鼻黃髮拳彎弓獵生人百步牛羊羶脫身落虎口不及歸黃泉苦哉難
重陳暗哭蒼蒼天

採蓮曲云雖聽採蓮曲詎識採蓮心漾楫愛花遠回船愁浪深煙生極浦
色日落半江陰同侶憐波靜看妝墮玉簪又云潯陽女兒花滿頭麩麩同
泛木蘭舟秋風日暮南湖裏爭唱菱歌不肯休

時終年...

長安秋夕云八月...

...

...

致木蘭長想風日暮南陽裏年即萎煇不肯材

白日蒸半古...

...

重刺謂哭查查天

吳興黃髮拳臂...

中門前南平...

...

...

唐詩紀事卷第二十八